

兩浙輶軒錄補遺

兩浙輶軒錄補遺卷三目

周嗣昇 王德璘 錢之青 周龍雲 邱賡鎧

何之杰 鄭元慶 陳大捷 查嗣鏞 錢大樽

凌 夔 許勉燾 錢聖謨 張繼樞 勞 史

錢綸光 祁曜徵 邵廷采 張錢灃 徐懷仁

顧 昌 許君羅 蘇雄振 徐祚增 沈堯咨

盛大鏞 錢士賁 高 岱 高 嵩 錢 佳

沈世屏 許王猷 張 珍 蘇滋恢 陳邦直

周兆雲 茅應奎 楊汝梗 胡國楷 蔡 礎

周維棧 姚際恒 朱 琰 楊 煒 陳光裕

查克承 張培源 王 芬 馮 溥 孫之騄

邱 京 彭景曾 曹元遴 范長發 曹 英

錢元佑	嚴啟端	童肇新	虞文彪	方韓
潘溶	盛禾	盛中	張琴	查嗣易
鄭景會	孫宏	汪元文	陳方峻	項天保
張岑	張杞望	牟文軾	陳望	章程
朱鼎鉉	沈佳	姚淳楫	王國	屠可播
張定陽	胡仲常	王武功	陸璘	黃龍眉
沈寧遠				

兩浙輜軒錄補遺卷三

周嗣昇

字長如一字虛舟
鄞人有鵲音集

華日南曰嗣昇少有詩名中年目翳以口授兄
弟子女姬媵至前者皆令爲書記積詩餘萬首

橫塘野望

愁作橫塘雲淚作橫塘水橫塘脈脈別離情幾聲羌笛梅花裏

笛

長笛誰家奏悠悠空外音幾聲秋夜月一片古人心塞北離
愁斷城南幽恨深難傳曲中意辛苦白頭吟

王德璘

字文白錢塘
人有縣林集

卜築

卜築西城郭棲遲湖上樓蓬蒿三徑雨黃葉四鄰秋樹裏橋

斜出門前水亂流乾坤何處好吾意樂林邱

送翁誕登之永嘉訪陸叢思

路隔一千里江連五百灘石峯迎棹險雲氣入衣寒山縣了
無郭書齋半是蘭士龍詞賦客相對足盤桓

錢之青

字鳳文一字澹村烏程人監生著澹村偶存草

岳州阻風

帆指瀟湘去其如風雨何秋聲岳陽樹寒色洞庭波欸乃漁
歌起微茫雁影過昔賢臨望處觸緒感懷多

王阮亭大司寇席上賦琴魚次韻

騎鯉仙踪不可尋溪魚遺種尚名琴臨淵應作凌雲想入饌
寧聞流水音漫試調羹歸鼎鼐底須封鮓自江潯司空博物
殊張翰嘉會秋宵索醉吟

周龍雲

字飛藻桐鄉人
諸生著懷孟集

除夕卽事

又逢一歲盡頭時
燈火青熒更漏遲
泥竈暖蒸新臘酒
盜瓶活養老梅枝
辛盤潦草忙諸婦
彩勝鮮妍鬪小兒
自覺隨緣貧亦好
年來懶作送窮詩

邱廣鑑

字韜武一字
望書歸安人

松林夜泊

微茫雲樹接蒼波
晚入蘆鄉勝槩多
燈亂虹橋喧夜市
月高烏榜賽吳歌
連天巨浸開霜鏡
繞郭遙峰點翠螺
借問雪灘濯足老
一絲何處著煙蓑

紅橋

一簇笙歌機畫橈
綠楊煙裏酒旗飄
香塵十里雷塘路
買斷

風光是此橋

何之杰

字伯興一字穀菴蕭山人

西河詩話

聖祖南巡獻賦頌者數千家之杰詩十章章六句聖祖特稱之令督臣詢其生平同奏查昇跋其詩云

聖鑒所及足慰穀菴初與徐伯調毛大可號越中三子刻有

俞寶華曰穀菴初與徐伯調毛大可號越中三子刻有合稿今已散佚然其詩如江陵女歌長干曲俱載于漁洋感舊集中而越風所選亦復不少因亟登之以補前集之缺

江陵女歌

江陵女兒子慣食江陵魚祝郎好網絲不近石牛渠上篙江水沈下篙江水浮送郎上江水相抱江津頭

長干曲

載儂小艚船載歡大航船願得合櫓篙共出買渡錢

送王雙白西歸汎舟湘湖見懷之作

晶嶽澄湖誰所鑿飛泉百道爭縈薄遠樹平臯沒晚煙浮雲
海外橫秋郭三百年來有此湖橋頭兩槩無時無湖裏鴛鴦
足菱芡湖上美人愁鷓鴣鷓鴣菱芡長如此秋月春花空碧
水樂府猶傳囉噴章宮中誰識元才子千金教舞百金歌月
華不住清尊裏吁嗟世事如奔電風流王謝難重見綠樹青
山冷笑人白璧黃金真可賤我公卓爾當世師布袍草履來
何遲結客不須飲河朔濯纓自咏滄浪詩獨立蛾眉誰不重
繇來大厦需隆棟此日沙棠狎白鷗他年桐樹推高鳳臭味
還疑昌歆偏神物會有風雲送秦皇苦欲求蓬萊大夫鼓氣
爭喧阗畱濟蒼生歸未晚與君共醉昭王臺

寒食

寒食今宵雨桃花又一年暮雲低接海春水動浮天消息空

豺虎風波感杜鵑謝公雖不起心爲萬方懸

長至夜

黃梅初罷雨庚庚黃雀生風遍海瀛壘水賣瓜周曲步單舸
折柳下陽城逢人襪襪知炎冷隨意鍋鑪就煮烹恐是石枰
多煨腹故依遠水傍駁驢

鄭元慶

字子餘一字芷
哇湖州人諸生

戴璐吳興詩話子餘嫻經濟著行水金鑑等書又撰湖
錄一百二十卷末刻箋釋顏魯公石柱記竹垞賞其精
核家有魚計亭膏畫西河竹垞合像侍坐請益載竹垞
年譜竹垞寄詩云鄭庄五亭住四面白蘋香竹樹早無
恙湖田低不妨圖書宜後定天意欲新涼近
得茗溪集期君讀草堂茗溪集宋劉一止著
汪嘉穀曰芷哇浸淫經史所輯廿一史約編凡歷代帝
王時事限以尺幅括以數十言旁及書志世家列傳撮
其大凡備見作者苦
心時有小谷口之稱

小谷口雅集

清風舉座盡詩人花發偏宜雅集頻天上鏡開光似畫池邊
雨過翠如茵書仍衆說非云著酒在鄰家幸不貧且喜羣公
題句滿曉堂錯落綵雲新

陳大捷

字用泰號霞西臨海人著有信口吟

題萬花樓

萬花樓外萬花開花下將軍醉幾回今日花殘人亦去獨畱
橫石一枝梅

查嗣鏞

字樸也海寧人著震山雜詠

斷虹岡

倒插清溪兩碧空砥平線直是天工疾風西捲半山雨殘照
東垂一截虹

錢大樽

字復齋海鹽監生著復齋詩稿

晚晴過卓錫菴

斜日籬間照微吟過水西雨餘春岸軟溪漲野橋低舊竹初
抽筍新荷半透泥山僧方飯罷獨坐聽黃鸝

凌

夔字友龍一字石齋烏程人康熙辛卯副貢生著樊川草堂集

烏青鎮志石齋少好山水嘗赴東甌游雁蕩又游匡廬探石樓香爐諸峯游屐所至一切寄之詩晚歲杜門著述共得十餘種

西寺

烏墩寺接青墩寺傳說昭明此讀書風景尚畱文藻在塔輪
天半兩芙蓉

許勉齋

字光隅海寧人康熙舉人

東窗漫興

清搖曉閣一渠水翠壓荒城兩點山片片晴帆依樹轉東風

吹土白雲間

錢聖謨

字昭平海寧貢生官宣平教諭著有玉巖樵唱

蔣德昌序略云先生善吟咏爲先達朱止谿所稱賞與仇滄柱查他山祝豹臣查聲山諸君子相唱和其詩淡樸雋雅諷寄遙深

登北固山

第一江山地乾坤入望中雲連京口樹濤壯海門風吳楚中流合金焦鼎峙雄孫劉千古蹟登眺幾人同

張繼樞

字用中號南湖海寧歲貢生著南湖編年稿

題金麗青浣紗圖

待月廊虛香草徑捲簾人泛白蘋湖那知異代丹青手却寫當年未嫁圖

勞

史

字麟書一字餘山餘姚人有餘山遺書

兩浙輶軒錄補遺

卷三

錢聖謨張繼樞勞史

五

通志史未就塾輒從旁舍耳誦六經年十七反復朱子
大學中庸序慨然立志爲眞儒館上虞顧氏有藏書數
萬卷三載卒讀晚歲預知
逝期沐浴更衣臥逝正寢
張廷枚曰餘山講學海濱精于易理門人桑調元發甫
恪守師傳爲刻遺書於武林沈椒園司臬自稱私淑弟
子歎曰近時諸儒之學稼書先生得其大
正楊園先生得其精餘山先生得其大
桑調元行略先生年四十二有悟于邵子天根月窟之
言遂得眞旨五十九歲新正傳家事招門人汪鑒曰是
月吾將去至
晦日而逝

古詩

萬物量所受興廢非徒然因材乃加篤栽培傾覆焉蒿萊際
炎曦亦誇枝葉鮮幽蘭處空谷苦節還自堅一旦時序改霜
雪瘁連綿羣卉遞萎謝國香將獨傳奠哉百里奚勤勞歷歲
年沒則竝流涕追思五穀賢商君行詐術威燄方灼天出亡
車裂殉秦人曾不憐

錢綸光

字廉江嘉興人監生以子陳羣貴贈光祿大夫著廉江詩鈔

汪嘉穀曰廉江先生性至孝父瑞徵官西安教諭先生勿克從歲一省視嘗著寒江歸權詩思致悽惋爲時所稱而集中不載無從搜訪惜哉

秋杪偕幼漁過澹存邇園卽事

一曲垂楊掩竹扉
梧風清暑坐忘機
主眞瀟灑親投轄
客亦麤豪自解衣
叢桂漏香秋意早
小山含雨草痕肥
無多結構成邱壑
對此茫茫識者稀

小樓如角拂秋雲
溪北溪南自此分
溼葉打窗驚急雨
短歌拍枕帶微醺
關心農事愛殘暑
閒話家常苦賣文
曉坐紅闌望晴色
水田鷗鷺自紛紛

贈友

野篁如翦翠痕齊
天氣新晴日又西
笑看老僧捫虱坐
自攜

斗酒聽鶯啼繭山初白亂堆雪柳葉拖青直到泥四月閒人
惟爾我興來那肯不畱題

祁曜徵

字旣郎山陰人諸生著有臥士詩藁

商盤曰先生忠敏之孫詩品清皎祁氏一門有男皆美人女皆才子之稱冉冉百年風流雲散豸府經過荒蕪滿目余嘗有句云帳下青綾思謝媛堂前綠埜弔裴公蓋記實也

道鄉臺懷古

抗疏南遷日猶知吾道存高臺多歲月正氣塞乾坤獨灑青
天淚誰招白日魂空憐逢逐客風雨下荒原

寓嶽麓書院題壁

乾坤牢落歎萍踪且抱琴書傍嶽峯所至焚香韋應物偶來
掃舍郭林宗風鳴竹磻流晴雪月上松關動晚鐘千里鄉書
魚雁杳白雲幽夢悵無從

寄懷沈子盛

益州西去暮雲停
萬里橋邊一草亭
鳥道極天秦樹綠
猿聲入峽楚山青
蜀人近解歌三婦
漢使遙傳出二星
却憶浣花溪上客
天涯踪跡似浮萍

登東武山朱相公山居用西河太史韻

縹緲高樓風日晴
登臨不盡古今情
靈峰夜湧瑯琊郡
遠岫秋低范蠡城
畫檻極天孤塔迥
綠蕪分渚片帆輕
築沙開閣皆陳跡
露網環巖草自生

六月六日作

先忠敏公殉節日

此日瀟湘弔屈平
彭城遺則古今名
東流不盡昭潭水
歲歲江臯長杜蘅

邵廷采

字允斯一字念魯餘姚人諸生著思復堂集

兩浙輶軒錄補遺

卷三

邵廷采

張錢濤

通志延采少從韓孔講學于姚江書院交戴山弟子聞
誠意慎獨之旨欣然有得每談忠孝節烈事神氣勃發
于明季諸臣尤

能核其本末

俞寶華曰思復堂集十卷載入
欽定四庫存目蓋以講學爲本而次及詩文者也

山行

入山路已深不辨出山路隔岸有人家一徑春煙護隱隱鷄
犬聲橋欹不能渡流水引殘紅漁郎幾回誤

居巢老人

白頭苦死依重瞳手刃義帝投江中西師縞素輕借力赤龍
高舉朝羣雄亦知財物無所取何不當時直諫羽雲中五采
豈足論咸陽一炬空自苦居巢老人真大愚玉斗撞碎疽捐
軀鴻門卮酒飲壯士項王大度相歡娛

張錢澐

字白湖錢塘人
著壽平堂集

客中作

人生有至樂菜衣奉盤杓人生有至悲辭家甘旨虧陶然依
戶牖得樂恒相忘蹙蹙去鄉土始覺心哀傷繫余有老父歷
年六十七薪米獨關心屢空貌蕭瑟感此出門去形影春風
寒羈棲苦未慣深夜摧肺肝兒身數多病常貽吾父憂客次
易顛顛強顏不敢愁父兮朝莫寒父兮夜莫飢兒在天一方
誰爲食與衣枕榦具良材風霜成秀色願及天地心苦心自
培植

徐懷仁

字元仲一字柘南嘉興人諸生有柘南詩集

將赴閩中畱別芷閭

富江春去路綿綿嶺峻灘危意惘然負米此生何可得賣文
今日亦堪憐殘年歎我經長道別地思君寄短箋回首津亭

易惆悵數聲沙雁小寒天

涼心閣

日長不受暑別有清涼境一燕語畫簾午夢溪堂靜

顧

昌

字東山天台人有醉秘草

西湖山閣

桐葉雨聲分芭蕉雨聲聚一雨萬物深山空遂難曙天光墮
雲煙湖光墮林樹望中反不窮故人在何處蓑笠古亭灣雨
中尚呼渡

許君羅

字夢伊天台人歲貢生

登樵雲樓

芳欄聊徙倚極目海天長湖色當窗靜江風入檻涼虹橋雲
外度畫舫柳邊藏欲覓樵雲處應攜月殿香

蘇雄振

字岱宗一字爲谿錢塘人著江左上谷滁陽等集

夏日泛舟具區

六月方徂暑扁舟湖上還
荷花三萬頃香徧洞庭山
幽勝藏春塢涼思消夏灣
神仙何處是縹緲白雲間

遣興

自笑生涯亦太愁旅懷鎮日望江南
酒香社日剛飛雁湖涌春波正浴蠶
市上細鱗憐白小園中碩果憶黃甘
何年塵俗摒擋盡三竺彌陀共一龕

左侯行

康熙戊寅余隨兄暮抵北關宿友人書齋
塾師張年八十餘少爲寧南幕客談軍中事甚悉且云侯殂九江戰艦艤岸輿尸以殮隨舉火銀匣函骨而去越今

又六十年塾師墓木已拱并名氏漫不記憶言猶在

耳紀以長句

平生讀書喜論史抵掌高談興不止憶昔關門遇塾師夜話
書齋感嘅時皓首師年八十餘丰姿倜儻意躊躇自言少作
寧南客老守殘編兔園冊干戈騷屑記當年韜鈴武略談今
夕侯從謫校總元戎赭面修長氣概雄指揮諸將開藩鎮辟
易千人立戰功中權乍握萬夫長偏裨同輩皆惆悵大帥張
旌排闥來尚書授節齋金貺敵愾從王赴朔邊矢心報國誓
軀捐蛇矛立陣千軍掃猿臂彎弓七札穿黃巾蠶起屯西土
三十六營爭嘯聚朝議督師辦巨寇詔任將軍殲伏莽牙帳
森森幕府威虛懷下士世還稀文人筆札劉公幹掌記方嚴
喻布衣性情樂易無偏喜帳下不畱歌舞妓滕口清談柳敬

亭關心藥裏楊醫士子本儒生廁幕僚戎服隨營轉戰勞囊
間時載中山穎腰下常懸大食刀神機策應原須慎調度中
樞多悔吝瑪瑙山前賊遁逃朱仙鎮上軍蹂躪運籌帷幄事
偏違坐使豺狼突出圍穀城請擊心徒切鄖竹窮追計已非
朝朝烽火傳嚴令畫角橫吹鼙鼓競主撫主勦日周章援楚
援豫疲奔命坐鎮嚴疆較射堂練兵過對左兵陣法盡龍驤八千
子弟環樊渚十萬艫艫駐武昌校尉兵多屯戊己司農餉乏
呼庚癸束篋如何可荷戈裹糧甬道空翹跂中原處處盡危
機力疾行間老鐵衣銜轡未寬頻趣戰師徒屢發奈驅饑前
營精銳後降將專兵閫外無專餉增竈晨煙釜未炊量沙月
夜籌空唱剽掠驕兵禁未休時時仰屋歎難籌敢云縱寇因
糧盡只爲屯田少食謀虞淵日薄龍髯下一木何能支大厦

樞臣記得是熊楊柄用人猶說阮馬牛壁江南坐井尊廟謨
錯亂王室昏豆其不借同根煮故劍渾忘割臂恩一朝將相
嫌疑起怒髮衝冠恨切齒按劍思清君側奸揮戈直向南中
指侯也原非跋扈臣疏陳罪狀達楓宸寧爲馬革與尸帥不
作灰釘乞命人板礮城築西防左皖江赤燄彤天火大將傷
心楊柳營游兵攘臂芙蓉邏將星西墜白雲深轍亂旗靡戰
鼓沈萬隊健兒齊解體五營豪傑盡隳心小侯歸命朝天去
平原客散關河阻馬鬣墳高定久封麟臺廟食知何處回首
從戎正少年而今白髮滿華顛不見臨淮新壁壘徒懷楊僕
舊樓船暢談忘寢興勃發燈殘月轉茶煙歇正襟危坐聽勿
喧雄雞三唱明河沒此話相傳歷歲年老翁墓木拱寒煙古
來多少英雄淚不獨田文涕泗漣

徐祚增

字道冲
秀水人

俞寶華曰道冲爲華隱先生哲
嗣與弟幼安正域並擅佳才

同人讌集送邵樾公歸武林

凝寒月冷霜華白名流高會長安陌金羅香泛琥珀紅玉壺
冰映蒲萄碧武林才子忽思歸堤沙拂樹飛征衣棧車高駕
行調轡官道低雲暫歛扉天涯俊及欣爲御共上河梁送君
去商聲羽調雜沓陳離別偏教煎百慮悠悠世路欽崎多誰
教翻覆成風波寸心不啻千里隔五交流派今如何與君通
門聯孔李白頭傾蓋情難已相期勿效輕薄兒輸心當面非
知己同調於今盡老成醪醕惜別還爭傾馬蹄莫謾嗟塵土
此去江南春草生西陵花發如列繡君歸正復長清晝試酌
花間酒百杯應添篋裏詩千首

沈堯咨

字山雁柘鄉人諸生著晚盥集

枕上偶成

連夜雨聲眠不著
昨宵東風忽又作
數聲孤笛起南樓
只恐梅花開盡落
寺鐘打罷天微明
門前屐響人已行
黃鸝知我朝慵起
飛度牆東報幾聲

盛大鏞

字匏仲嘉興人諸生候選訓導

嘉興府志大鏞有別業在南湖旁曰匏菴集里中人爲竹林詩社其詩初沿七子厥後學皮陸晚乃似放翁常識錢文端公于總角時年八十三卒

盛百二曰從祖匏仲先生結竹林詩社每會必數十人竹垞太史集盛秀才書齋觀文嘉水墨杏花新燕詩卽會中作也性孤僻里中過從稱莫逆者不過姚雪坡沈皐羽項古村及東井陸蘊崑麟書昆季家宜山數人然有知人識石門某氏以僞學欺世人往往爲所惑先生獨聞之至絕交錢文端幼時先生卽以白傳相期許果如其言身後無人詩文零落殆盡向見有自怡堂集二冊及村居七律百首今不知所往頃舜江弟忽寄匏菴

近稿一帙云得之西吳書賈云

俞寶華曰匏仲司訓與兄丹山楓稼軒禾齊名其結詩社之匏菴在郡城東南白芻村之梅溪與蘇橋相近今已莫名其處自怡堂集亦叢殘不全然讀香樹齋盛高士傳文采風流猶可想見

村居絕句

村家小豎也從師日課神童四句詩報向先生蠶事好十觔繭做一車絲

初夏與項南村同往匏菴和葛堦允升見懷之作

老來應遁跡病後欲浮家寄買初生鶴分栽未見花禦寒儲白氎消渴削紅瓜乞假通鹽粟村風正足誇

錢士賁

字燭巖嘉善人

懿行編燭巖怡情詩酒有晉人風致

俞寶華曰燭巖弟士壯事兄極友愛讓食分宅兼恤其孤有佩璐軒詞今不可得見僅得燭巖詩并附誌之

兩浙輟軒錄補遺

卷三

錢士賁 高岱

園居

晝永息柴關
莓苔雨後斑
步深同鶴遠
坐久似鷗閒
賦就題枯樹
詩成綴小山
莫看塵外事
窗隙鬬蜩蠻

高

岱

字礪山一字霞城平湖人考授州同文格公士奇孫編修與長子著瓶廬詩稿

朱爲弼曰霞城公弼外曾大父也澹名利以父異亭公卒于官哀毀過節得心悸疾旋里吟咏甚多惜散佚過半弼爲編之得四卷詩境幽奇寄託深遠洵足參唐賢之席云

野望

溪水無波靜漁舟獨繫閒
雁低雲影去牛帶笛聲還
落日餘芳草荒煙沒遠山
爲貪看暮色倚杖立松關

長安旅況

本非巖穴知名士祇合風塵瘁
此生落日奴肩千首重長空雁足一書輕
可憐片月他鄉照更送浮雲故國行
篋內徒存

報恩劒琤琤每向夜深鳴

七夕

鬪草童年倏似梭
愁看牛女渡銀河
步虛自是神仙事
未必填橋用鵲多

高

嵩

字三臺一字峻齋平湖人岱弟官山陽縣丞著醒閣詩稿

朱爲弼曰峻齋先生弼童時猶及見之風度端凝卽之藹如也工書與姊婿張得天尚書齊名詩亦蒼勁秀逸

舟過赤壁次凌康伯韻

赤壁突兀凌江干
兩山合抱天風寒
漢陽直下二百里
但見雲氣蟠峰巒
遠林凝陰鬱葱蒨
輕舟踏浪奔如電
蛟龍鼉鼉多難名
怪石嶙峋矗江面
危亭屹立憑高城
帆檣夏口紛縱橫
江流到此忽一束
煙波無際沙浪平
拍拍鳬鷺出洲渚
雪堂泥阪知何所
黃州古稱江水窟
齊安城樓好延佇
混茫一

氣俯馮夷長空獨鳥隨風吹何當登岸酌杯酒千載遙結坡
公知

西湖夜泛

四望青無際山光列畫屏樽前初見月花下獨揚舲煙鎖六
橋靜波涵一鏡青還須攜短笛吹與老魚聽

錢

佳

字平衡一字臨谷嘉善人諸生著遊溪詩鈔

嘉善縣志佳天性真擊事後母以孝稱妻曹爲陸清獻公外孫女佳於甥館得理學真傳私淑倍切汪嘉穀曰臨谷少時爲竹垞太史所賞及長與禾中諸名宿遊如魏處士州來盛居士宜山陸太史坡星柯明府南陔詩酒談讌殆無虛日所輯有嘉善形勢說又與丁廷煥選魏塘詩陳

同支巘東沈松阜曹六圃查研北易亭陪陳燭門先生

過梅花菴訪吳仲圭墓次韻

肯將詩畫咤專家處士風高薄彩霞竹妥斷碑寒見節梅橫

孤隴老無花三間佛屋藏遺稿一掬幽澗薦野茶懷古雄詞
酬未得空慙點筆墨如鴉

挽檢討朱竹垞先生

斯文海內推宗主豈料箕垣遽掩芒經義一編綜兩漢詩篇
千載儼三唐鼇風不見高山仰駕水空流學海長會葬萬人
皆雪涕況逢世講更維桑

更深

更深忘坐久門啟夜如何霜冷侵寒骨茶清敵睡魔荆妻勤
補綴稚子試咿哦不覺東窗月移來梅影多

沈世屏

字錫侯一字帶河海寧人康熙壬辰進士授檢討出爲長沙知府

芙蓉

年年江上笑秋風秋自蕭條我自紅花譜應將蘭菊伴游人

未許管絃同清宜霜露原非傲隱入蒹葭宛在中寂寞一枝成獨賞不須翹首問天公

許王猷

字賓穆一字竹君嘉善人康熙癸巳進士官內閣學士

楊文藻曰竹君典試江南所錄皆績學之士長洲沈歸愚宗伯亦登是榜一時有得人之譽

題繩武弟承祖雪莊漁唱

吾弟家在白秀里宗伯文孫清卿子妙年性癖愛湖山綵筆時還供驅使詩思冥搜詩格新單辭隻句亦驚人山容水態殊難狀一經寫出何精神愛爾天才洵綺練幼婦詞成誇黃絹春草池塘憶惠連別裁僞體開生面雪莊隱處人不知自將漁唱譜竹枝相期大隱隱朝市請賦清廟明堂詩

張

珍

字播方一字韞諸海寧人康熙癸巳進士授檢討

樵石詩話張公骨節稜稜短小捷給非竟掉書囊者詩文字畫岐黃堪輿皆涉其流

聖祖南巡曾獻詩賦晚得一第
召對時自奏願讀中秘書得與館選未幾卒官

晚步

官邸傍松關扶筇籬落間柳邊春水艇花外夕陽山偶逐浮
雲出仍隨倦鳥還客中無意緒贏得此身閒

蘇滋恢

字茂宏一字畊餘餘姚人康熙癸巳進士官杭州教授

裘鞞煦曰先生起牖風流聲光日起其歸也自製一
棺題其上曰長物不攜些子去一龕秋雨讀殘書
華日南曰畊餘先生秉鐸武林十餘年高安相國方巡
撫浙江器重之延主敷文書院造就人材後先鵲起梁
相國詩正陳京兆兆崙
孫銀臺瀨其最著者

溪行

翠籐紅子傍籬斜點點珊瑚映綠紗小鳥忽穿叢薄去暗香
一線露茶花

蒼藹遙生燈火微寒泉漱石激苔衣浴村露葉落如雨溪上

漁翁暮未歸

陳邦直

字方大一字愚亭海寧人文簡公

俞寶華曰愚亭太史侍養歸里年甫逾壯即絕意進取共先文簡公得奉常隅園增闢完美人比之謝山裴墅太史移家其中每遇春秋佳日紗帽隱囊詩酒自樂垂四十年乙酉

高宗

駐蹕園中太史迎駕恩晉侍讀茲

賜詩

六章中有內翰肯堂年句洵異數也子善貽穀齋善慶

駐蹕

推恩特晉

黃飽稻田餘齋咏白鸚鵡云自解禪機超色相不矜文采正聰明皆佳妙也餘齋例授別駕庚子亦以

邵司馬云

送春

綠陰如水雨如塵無計能畱九十春一闌長亭歌欲斷夕陽

芳草倚樓人

周兆雲

字苑遊一字鶴山鄞人康熙丁酉右榜舉人官江南太倉衛守備著有問心齋詩略

華日南曰苑遊藝武能詩尹相國開府江南時極賞之
後以養親乞假歸遂不復仕乾隆丁酉鷹揚宴猶矍鑠
故如

重宴堂閒坐感成

霞彩橫空日夕天重思舊病向燈前
痲風已脫丙申歲鷹宴
重逢丁酉年隨分杯盤孫婦供和身
藥物仲兒煎

仲兒知醫就眠

更進三蕉葉一醉遽然夢蝶仙

茅應奎

字具湄一字渠眉又字湘客歸安人康熙

有汪嘉穀曰湘客自昌化學博罷歸著五湖詩鈔
詩集則諸草廬宮詹厲樊榭徵君齊息園宗伯爲之序
長洲沈歸愚尚書有贈句云廣文官冷遲紆綬著述年
多漸等身又別後倍知詩律細

相逢定訝鬢絲新備極傾倒
楊文孫曰湘客紹五湖詩社與諸草廬桑菴
甫諸先生交卒年九十餘編纂吳羹已刊行

壬申上巳同張浦山陳匏村修禊金陀園

桃花里畔春風香楊柳灣頭金線長倦圃風流雖杳渺倦翁

故址剩蒼涼來往金陀幾二紀主易宋王遺輞水竹亭

吳來之吏

部園

綠雨

朱文恪相國莊名

盡荒煙畱得靈光蠡湖汴玉山老客過

絳人興發共討鴛湖春鴛湖騷將代興夥大半競踏東華塵

謂諸具

茨祝豫堂朱栢巢王穀原錢壺尊汪厚石諸君

剩有吟壇幾名宿吳越尋盟偕

鷗鵲吹笛舟過放鶴洲賞詩閣上王官谷風裳水珮酒誰斟

素素娟娟少嗣音傾國醉妝飛一舸華鐘粥鼓坐消沈水繪

詞場今已絕宜山一瓣誰爲爇

盛宜山築瓣香樓有竹林詩社

升沈代謝百

年懸朱李音徽長斷歇南宗繪事西江詩

瓜田山

懶逐高鴻

表羽儀更有閉門工索句入林把臂共追隨先鋒白石同游

玩

謂李倩香山

月波春釀供文讌鷓鴣湖吟客

鐵珊

獨愆期空把竹枝

歌百遍

鐵珊向有弄珠樓百絕

嬉春老鐵漫癡顛懷舊追歡一惘然記

取樂郊吟賞地文禽雙逐木蘭船

古意

池塘莫種藕藕長長牽絲絲牽中不斷纏綿無盡時

古怨

山雲不出山只在山中駐生憎隴頭水東西背流去

過岳陽樓址用少陵韻

會合九江派流傳三絕樓水天雙眼豁身世一漚浮岫溼濛濛黛帆飄泛泛舟釣船明月夜何限白雲流

楊汝梗

字工求一字青眉仁和人康熙辛丑進士官雲南同知

雲蠓齋詩話工求住家桐水一眉微有青色因自號青眉嘗賦盛京竹枝詞有分明夫婿當門坐不待相扶下馬來句傳誦人口

車向榮曰工求以名進士宰永昌循聲爲全甘第一上官薦牧肅州

兩浙輶軒錄補遺

卷三

楊汝梗 胡國楷

俞寶華曰工求紅
杜村莊詩見栖乘

寄懷俞邱民先生

先生避俗隱長離農可爲鄰釣可師愛主絕無蕭穎僕傳家
猶有鄭公兒貓頭綠迸初晴縹甕眼黃開隔水籬最好橘香

過小雪木奴紅後出新詞先生舊著如夢令詞詠橘甚佳

胡國楷

字鏡舫山陰人康熙辛丑進士官儀曹郎

汪嘉穀曰先給諫公未第時司訓紹興有越中七子台刻鏡舫其一也

板橋

平接花間嶼斜通水上村經霜時有跡憶別幾銷魂波靜浮
人影苔乾記漲痕春城三百九何處赤闌門

無錫

一帶人煙抱碧流惠山晚對翠全收官塘斥堠分金匱小市

門關似虎邱別浦爭歸橋下艇夕陽明盡水邊樓今宵不作
鄉園夢已向山陰道上游

羊流店

此地曾生折臂公久于晉史見遺忠至今舊里垂楊樹猶起
當年緩帶風身後淚痕揮峴首使來藥物信江東樓船西塞
山前路盡道平吳是阿童

雪後望西山

蕭蕭落木盡秋聲曉向菰蘆岸畔行昨夜燕山初試雪寒光
直照范陽城

蔡

礎

字芥軒
黃巖人

塞之柳

春風薜蘿隨地綠燕語桃花鶯奏曲玉窗小女字莫愁南陌

踏青艷粧束踏青不足摘春花胭脂紅透牡丹芽杏子薄衫
吹柳絮惱人天氣弄琵琶須臾柳絮如飛霰斜抱琵琶半遮
面贈人芍藥賭榆錢貼水桃紋寫秋扇十六嫁與浪遊夫折
柳攜樽聽鷓鴣銀箏烏啄花架倒錦瑟塵鋪花塢燕自從折
柳試離別梅子青青打鳴鳩章臺煙月漫垂絲夜雨黃昏杜
鵲血江南柳浪開春天塞柳春殘兒捻拳江南折柳送行客
塞柳椿牽行客船

周維械

字因嚴
慈谿人

鄭勳曰因嚴少卓犖不受繩尺爲文千言立就顧坎珂
不遇窮老以終年七十九疾革口號曰適來適去掉臂
大空但能無愧明月清風頃之正襟端拱而逝生平著
述歿前二日悉焚之曰生逢盛時而卒至湮沒甞此何
爲家人力爭之不得惟天
放集間有傳鈔亦殘缺矣

香山寺

翠繞松溪千百折煙橫竹塢兩三家禪扉不掩稀人跡清磬一聲驚暮鴉

秋夜有感

空庭人靜獨徘徊默默閒情未許猜秋自梧桐聲裏得寒如促織語中催家書忽至驚還喜愁緒無端去復來近羨故園歸有日強將杯酒慰衰頽

姚際恒

字立方一字首源仁和人諸生

毛西河集奇齡作山陰何氏藏書記毛會侯見之曰何氏藏書有幾不及姚立方腹笥耳

吳焯薰習錄立方少折節讀書泛濫百氏既而盡棄詞章之學專事于經年五十日向平婚嫁畢而游五嶽予婚嫁畢而注九經遂屏絕人事閱十四年而書成名曰九經通論又著庸言錄若干卷雜論經史理學諸子末附古今偽書考持論雖嚴足以破惑學者稱之

潘學敏曰際恒家建海峯閣西牕面湖簷際懸舊窗霽紅婉夕陽映射滿室皆作霞光有西牕絕句云高閣虛

明木榻施畫間兀坐每移時湖山
一角當窗面烟樹殘霞晚更宜

宣和寶硯歌

紫潭千尺深泉落如飛雪百夫挽縵下篝火出淵穴此物由
來帝座傍楓宸翰墨染龍香昔日良材取非易天府第一逾
琳瑯漢庭玉硯不可見右軍風字徒追羨故瓦浪名銅雀臺
遺甎侈說未央殿唐代澄泥不任磨那知良璞生斧柯鳳咮
鸞精積垂露金聲玉質含蒼波當時妙選良工琢絕去瑀鏤
崇古樸雙龍蜿蜒守天潢海濤屈注銀河落道君藝事絕代
工萬機之暇繪草蟲宮娃襯手星初潤御筆濡毫霧乍融移
時縮身入五國天上奇珍散南北不知此硯落何方墨花黯
黯無顏色毳帳穹廬久苦羈舊時環寶豈堪思吁嗟人事有
榮悴此硯巋然無恙時遷流更閱幾時主馬肝蠅翼光逾古

轉入商山吳氏家購之不啻南金估襲藏再世亂離遭珠玉
千囊盡棄拋獨攜此硯繫衣底經旬走向空山逃咄哉吳侯
誰能爾寶過頭目與腦髓若非呵護等鬼神兵戈所過瓦礫
耳嗣君手持歸予齋爲言得所不沈埋予藏七硯亦殊絕終
讓此石無與儕朝朝元雲出瑤島夜夜蒼龍舞天藻今爲好
古堂中珍昔屬宣和殿上寶茅齋光怪起氤氲願託堅貞砥
礪勤他山可攻匪玩物千秋萬歲壽斯文

家藏東坡笠屐圖貌似毛西河戲贈一絕

笠屐圖中貌逼真千秋遺墨蚤傳神前生曾向眉山過莫認
西河是後身

朱

璿

字燦文海寧人著偶吟草

尤侗曰燦文家鹽官之硤石一旦流寓吾吳以秦越人
名踵其門者冠帶相錯又以應接之暇發爲詩歌一時

與之遊者
皆詩人

雨後登紫陽山

曳杖尋幽壑來登第一峯
大江春樹合孤寺暮雲封
澗水斜侵郭樓臺半入松
客心何處寄遺世憶仙踪

懷陸冰修先生

江左論高士風流獨有君
著書忘歲月落筆走煙雲
一水晴光合雙峯爽氣分
何時來草閣相與話斜曛

楊

煒

字赤雲桐鄉人諸生著雲竹詩鈔

過豁公山房

訪師師不值深竹護雲居
竈僻茶煙冷松高鶴夢疎
禪心眞閨寂吾道亦空虛
未識何時返徘徊落日餘

靈隱山房

門閉千峰杳軒牕翠色分樹遮窺戶月泉送下山雲竊果猿
雙箇離塵鶴一羣近知山境接兀坐息聲聞

陳光裕

字分佩秀水人
諸生著謹堂集

汪嘉穀曰分佩嘗輯漢川詩
鈔付梓收羅風雅別具體裁

村居

村居聊養拙家事付諸兒漸入清閒境都忘少壯時學將求
自得名豈望人知潑眼春光滿銜杯且賦詩

查克承

字坤元一字寄材編修慎行次子
海寧人國子生著授拂齋詩存

余習曰坤元之詩宗長慶書摹思白畫花竹翎毛神似
暉壽平藥鑑吟卷冷然有出塵之想嘗夢呂洞賓與丹
授拂如有所悟因
以授拂名其齋

穀雨日作

一番花信閒中擲又見新陰壓老榆夜雨欲來催布穀春風

猶是喚提壺牀頭麴葉爲徒侶門外溪山似畫圖興至行吟
懶便住悠然身世了無拘

張培源

字江亭一字尊鄉平湖人貢生著吟香草

俞寶華曰尊鄉與沈季友同爲陸雅坪閣學快婿一時有陸氏二坦之目哲嗣儼珊亦工詩

飲白龍湫水懷李潛夫

幽尋共所愜秋水得潏潏一酌覺餘爽孤懷相與閒天空鶴
不返落葉滿秋山

王

芬

字來素嘉興人著蘭堂集

送李秋錦之山西

客子戒嚴裝春風勸別觴前溪煙柳發夾岸野梅香雁度吳
天遠人行榆塞長君才須自惜前路易風霜

馮

溥

字容大一字積因平湖諸生

朱爲弼曰積因先生詩宗陸劔南書法歐陽率更所居
小耘廬有梓樹大逾數抱每當花發偕厠樊榭金冬心
諸人作梓花聯吟著有積因詩草
小耘廬唱和集厠樊榭爲之序

池西待月

涼陰界疎林方池面爽塏軒窗敞晴虛圓魄半嵌采西園列
嘉賓延賞擷芳莖湛然水石間白雲淡空靄秋風來幾時令
節倏已改鼙鼓殺初更蟾光未離海轉益吟興長詎惜夜深
待輿輪動悲笳高會邈千載良晤古所希譙游豈辭忘寒颺
動前庭詩壁正堅壘

簪月和張鐵珊韻

秋河明欲滅小立向茅檐蛩語不離砌蟾光時近簾蕭蕭涼
氣逼撼撼葉聲添有客來宵話茶香試一拈

孫之騷

字子駿一字晴川仁和人官慶元教諭

俞寶華曰松園詩入
欽定四庫別集存目中孫頤谷侍御陸說中亦極稱之願詩

已佚僅得此二首所著尚有松園經說蟹錄等書

扶病遊理安寺贈雲岫開士

寺在深山裏探幽力疾來穿林試屨滑曳杖撥雲開松密陰
沈晝溪喧瀑濺苔題詩無好句願就已公裁

梅花畫扇

晝取寒梅三兩枝一枝枝抱歲寒姿人間若論酸醎事問著

梅花總不知

邱京

字萬平一字稼堂仁和監生有漁遊粵遊諸集

華日南曰稼堂詩毛奇齡稱其得錢劉風味

襄陽懷古

楚國風光入眼青中流問渡一揚舲峴山晴色連雲夢漢水

春波下洞庭墮淚碑荒人寂寞登樓賦賤客飄零低徊往事
斜陽外忽聽漁歌起夕汀

彭景曾

字承祚海鹽人
官保定同知

俞寶華曰羨門少宰旋里後于將逝前一年九日命與
載酒偕羣從登秦駐山賦詩有一生幾兩中郎展更不
登臨柰老何之句識者知爲詩訖然是會一時稱盛承祚所作亦此事也

九日侍家大人登秦駐山

佳辰聊此一登高十里寒垌萬頃濤霜樹清嚴紛可數雲峰
高下迭相遭社公無主祠秦政海賈何人弔楚騷幸得將車
來騁目不才終自愧西豪

曹元遴

字子俊
平湖人

施嵩日子俊詩名與陸義山並稱余
從西湖覽勝詩錄得二作並存之

孤山補梅

鶴去亭空不忍看飛翬重得表湖干難尋處士評香雪幸賴
冰姿傲歲寒繞屋昔曾誇勝賞憑欄今喜續清歡山窗月起
枝籠影幻作龍蛇石上蟠

夏日泛舟湖上入天竺寺

明聖湖頭小艦輕誰將西子贈嘉名荷香飄去風猶韻梵唄
飛來意轉清水盡喜逢山路接松高猶帶石泉鳴慈雲一片
分靈竺景在禪中好細評

范長發

字舒山嘉興人官盱江知縣著有敬亭詩稿

舟中卽事

謝家埠到溫家圳六十程行半日中一路看山兼看水扁舟
聽雨又聽風酒能破悶誰同酌詩爲消愁愧未工戍鼓沈沈
人語寂笛聲何處怨遙空

憩天竺菴

長路難忘暑停車問竹林煙霞山寺古鐘磬夕陽沈淡可忘
塵境清還見素心坐來渾不厭蟬嚮起秋陰

不寐

飛符計日下江州却喜風行順水舟客夢清燈連夜雨蟲吟
孤枕亂山秋櫓聲徹聽灘聲急暑氣清從水氣收何事三更
猶不寐年來踪跡等浮鷗

曹

英字亦聚一字雪巢
歸安人有送老集

懷黃九煙先生

青山高可臥志不與時卑翻覺文章累長于貧病支鶴翔雲
逾迴梅老月偏遲何日春風裏重瞻松柏姿

錢元佑

字希韓嘉善人官富陽
教諭著有春江詩草

莧浦歸舟

平江放棹泛中流，煙水微茫一葉浮。
日落遠山含暮靄，風輕古渡送歸舟。
鱗鱗魚艇收前浦，點點沙鷗集小洲。
十幅蒲帆俱已落，暫停汀渚漫勾留。

嚴啟煊

字楚隣，號初隣，餘杭人。貢生，著有《古秋堂詩集》。

楊秉初曰：初隣先生爲司農沆之孫，司城曾業仲子博極羣書，能世其家學。家故貧，挾策走四方，抑塞磊落形諸歌咏，殆所謂窮而後工者。

寓相國寺酬沈叔良次原韵

書劍渾蓬勃，誰言氣自華。
征程今世債，禪界宿生家。
懷古愁空集，交君夢亦誇。
江鄉壇坫冷，回首夕陽斜。
古寺餘叢木，涼從竹簟生。
今風飄旅思，舊雨慰交情。
雛鳳聲嘗憶，天漿咏更傾。
何當茗水上，茶笋重尋盟。

風字硯

尚有蘭亭墨瀋濃

王右軍用風字硯大尺餘色正赤

寓形專頌富春翁方員

不逐時人好平坦還存太古風滌向月潭生地籟書成雲篆

總天工鳳凰池本尋常物誤盡諸賢過耳空

米芾硯史晉人有硯如鳳字者

下兩足謂之鳳足所謂鳳凰池是也今誤爲風字

林得軒新齋

牙籤遙映碧天空香結樓臺筆吐虹欲賀新齋無長物贈君

明月與清風

鎖茗橋

樹裏環橋旁水莊從來此處斷人腸縱教鎖得茗流住難鎖

愁人在故鄉

童肇新

字浣思遂安人康熙丁未進士官江南祁門知縣

兩浙詩軒錄補遺

卷三

童肇新

虞文彪

方韓

三

華日南曰浣思少嗜學貧不能舉火讀書自若遂以文名

小雨坐雲起庵

可見無人境
條然與世分
鐘聲停半壑
水面湛孤雲
桷林
中老隣春雨外
勤隔城剛廿里
雞犬不相聞

虞文彪

字子雲一字省庵海寧人康熙丁未進士候選知縣

李陽河

回首江城遠
登艫一望賒
亂檣森極浦
羣雁簇晴沙
林淨無
霜葉邨寒有
雪花繫船何處好
楚岸酒旂斜

方

韓字若韓一字佐平遂安人康熙進士官中允

華日南曰佐平負雋才踴躍不羈成進士入史館文名走海內尤善爲古文氣勢如絕壁天懸騰波迅急

寶石菴

碧磴丹楹佛火沈
茅菴結構傍疎林
峯藏宿雨迴千嶂
徑繞

長河眺萬岑倚檻蒼茫蘆葉細懸崖屈曲野花深自知先世
遺親在爲禮空王聽梵音

潘

溶字秋岳天台人
康熙壬子副貢

東湖歌

東湖樓閣連雲起芰荷花開嬌綠水綠水盈盈動畫橈鴛鴦
飛過垂楊裏垂楊參差翠煙浮曲岸停橈更上樓何處清歌
飛白雪玉簫吹徹小瀛洲瀛洲窈窕稱佳麗三島雲霞路迢
遞輞水依稀華子岡武林彷彿桃源記樵夫祠前天欲晚陌
上遊人尚未返碧波皓月共潮生獨對淪漪步芳畹湖光月
色夜徘徊琪樹飄香入酒盃更有何哉能度曲不知身已在
蓬萊

盛

禾字旣同一字稼村秀水
人歲貢生官天台訓導

嘉興府志禾少遊四方足跡所至凡川原景物碑碣陵墓不厭詳述積數十冊頒資掌故俞寶華曰稼村與兄丹山齊名其詩齊次風先生爲序未梓余從其家索得抄以補入

野步

入春多苦雨偶得數日暖郊原踏青去鶯啼綠楊岸村逕喧
童穉柴門狎雞犬春風吹桃李暗香任零亂野渡煙蒼茫悠
然歸獨晚

武陵喜逢張五去矜兄弟

淅倒風塵劇可憐一回相見一悽然南舟北騎五千里滄海
桑田四十年二頃新畬供飽飯數椽老屋足安眠花源此去
無多遠雞犬雲山別有天

分宜道中望鈴山有感

嚴嵩登第後讀書十年處

通靈御醮徹清宵一首青詞動九霄相軋西川訟牛李好還

東市歎爰鼃豈知宮觀天書詐至竟河湟牧馬驕十載鈴山
成底事茂陵遺恨雨瀟瀟

田家

春雲壓樹透斜輝草暖平田布穀飛野老溪頭相語過一犁
酥雨早秧肥

菜甲初肥帶雪挑春流緩緩送輕橈田家酒熟相來往黃竹
村扉白板橋

盛

中

字南樵
嘉興人

村居

園公溪父笑衰容却悔遲爲石戶農似畫雲山眞北苑如禪
功課託南宗拏杖臥壑棲霜鶻疎雨融泥長簪龍許掾尚攜
勝具在金箱五嶽意偏濃

張

琴

字主林武康人諸生

徐飛熊曰上柏沈烈婦適童姓始有醜行婦泣諫姑怒以銅斗損其頭臂潛置毒麥飯中命之食婦心知其謀然不敢不食也竟死主林作秋胡行以哀之

秋胡行爲沈烈婦作

有烏夜啼血有蟲日懸絲妾命諒云薄不敢怨氓蚩小心事
春作常恨采桑遲采桑亦弗遲伊家婦難爲曉行畏多露欲
語難爲辭姑命理當順妾心義不移非敢逆姑嫜祇恐負母
儀處身左右難仰藥甘如飴再拜謝姑嫜中惟好自持

查嗣易

字天行海寧人著自怡集

楊文孫曰天行好作詩慕白香山以自怡名其集又以無地不樂隨遇而安作樂安先生傳蓋自謂也

近況

柴門一逕入桑麻四壁蕭然處士家時爲買書傾橐米偶緣

排悶灌盆花桐孫未斲先營譜梅子初肥漸減茶底事壯心
消不盡夢隨驃騎獵龍沙

鄭景會

字又韓一字慕韓又字海門仁和
人諸生著有醉愁海門鷓鴣等集

蔣炯曰海門與柴陞升胥山創讀書社工古文精博與
衍著論庶母書諸繼子論諸作據經證律足端風俗詩
格力追初盛配俞安平亦工
詩詞著有平泉山莊詩詞稿

送友之江右

送君千里獨揚舲一曲離歌不忍聽日落孤穿英布墓花深
客醉魯公亭天連百粵秋雲綠地接三湘遠樹青別後援琴
懷舊侶滕王閣下水泠泠

悼洪昉思

潦倒名場四十年歸途竟作水中仙樽前顧曲無公瑾鄴下
論交少仲宣故國魂招烏戍月新秋夢斷白蘋煙臨流欲灑

山陽沙悵望西風倍黯然

孫宏

字衛郊仁和人
著南樓詩存

梁山

長江空鎖鑰峭壁峙東西石倒猿旋挂雲深鳥暗啼濤聲驚
澗落日影傍峰低弔古情何極鄉關望裏迷

游聖果寺

翠微通徑曲寶殿倚雲開嶺樹穿檐出江潮入檻來磴危懸
薜荔碣古抱莓苔何處尋靈運翻經却有臺

汪元文

字乾茗錢塘人
著蓮溪草堂集

桃花塢弔六如先生墓

筆墨猶傳好事家忍埋玉骨在泥沙淒涼西竺菴前月辛苦
南京榜上花過客未須悲往事歡場自與作生涯才華猶得

占芳塢新種穠桃爛似霞

明霞墓

明霞者前司李馮公可賓之侍兒卒葬峴山有碑誌
曰石蒲齋侍兒明霞之墓越今六十餘年人無知者
一日茗上士人請訖忽降筆云生長臨清十九年偶
隨車馬過茗川知心唯有嶺頭月夜夜臨風泣杜鵑
峴山明霞題好事者遂競爲吟詠余亦賦焉

羅浮且漫說朝雲好與貞孃片壤分青冢荒村多少在遊人
競弔侍兒墳

陳方峻

字雲上一字酒堂烏程人諸生著抑村詩草

熊大軾曰酒堂偶游北山薄暮避雨茅舍遇一道士踞
跌蒲團上卽敬禮之道士曰子來此有夙緣因叩以數
事後皆驗道士命煮白石子數粒食之不覺其石也臨
別授道書一帙越日復過之則茅舍無存因自號白石

子

潘學敏曰紀子深有贈白石子句云詩腸冷過深秋雨
墨妙閒開靜夜香茶鼎火紅聲入細个中消息是文章
時稱
知言

茗上訪僧不遇

綠楊影裏板橋斜茅屋無人自落花偏是閑僧忙不了山頭
日日採新茶

旅中

六千里外未歸身花裏懷人春復春著意遣愁愁不去鬢絲
添得許多新

項天保

字東里
黃巖人

華日南曰東里
詩見則社偶咏

登樓有懷周蛾椒

層樓高傍小城隈極目東山迴自哀幾載殷勤頻對酒各天
消息此登臺斗間遙指雙龍合江上時看一雁回日暮相思
渺無際半窗風雨獨徘徊

張岑

字鬱蒼一字帖亭歸安人以
通判充纂修官著帖亭詩草

楊秉初日帖亭詩
有性靈格近唐賢

懷匠門

送盡南飛雁天涯獨倚樓無金難結客多病怕逢秋江上鱸
魚美牀頭麴釀浮昨宵歸夢疾匹馬渡蘆溝

秋夜史局

落木蕭蕭夜正殘秋聲和月到闌干在家多難別離易負郭
乏田歸去難咫尺雁鴻書漠漠半年蝴蝶夢漫漫蹉跎贏得
鬚如戟羞對陰符仔細看

張妃望

歸安人著黛
石草堂詩

秋夜偶作兼憶稚川

空庭閑竚立此夜疾初平月落花無影風搖露有聲螢燈然
古木蛙鼓亂殘更偶憶憐才句偏思太瘦生

夜過江東寄正夫先生

扁舟還入夜遙渡秣陵東山勢迎孤艇江聲落短篷夢迴千
里月身逐五更風不盡飄零意裁詩寄放翁

牟文軾

字世行一字
熊乘黃巖人

謁郭凌雲先生

相逢深恨晚況復對飄零雨雪侵吟鬢江湖滯客星缺彈秋
月白囊展夜燈青垂老英雄色風塵豈暫暝

陳

望

黃巖人

江上行

江流昨夜添新雨
綠樹坐鶯嬌不語
春風白紵冶遊郎
斜日紅紗浣溪女
青山江上峙嵯峨
江中新水生洪波
畫船撾鼓凌風去
兩岸春聲雜擢歌

題正等廢寺

青山行欲盡
古樹鎖僧房
雲氣千峰暝
秋聲一院涼
長藤懸破衲
落葉覆空廊
幾許前朝恨
高吟細草荒

章

程字亦玉
臨海人

尋僧歸詠

小院空林晚疎煙
冒古藤水心清似客山
骨瘦於僧酒醉秋
偏冷途紆意不勝
乍聞鸞鳳響何必訪孫登

朱鼎鉉

字楚禎海鹽人貢生以子佩連貴贈侍讀學士著豐巖詩鈔

沈德潛曰豐巖詩近唐賢風格
朱竹垞先生於後輩中每推獎

雨後放舟

小壑連旬雨輕橈泛綠溪春寒花事晚水漲野橋低漠漠煙
中柳膠膠午後雞亂雲飛不盡又過夕陽西

秋齋雜興

觸景皆堪適維秋更灑然白雲飄似絮空水碧於天漸覺輕
綃爽渾忘小扇捐誰憐憑弔客猶有續騷篇

沈

佳

字昭嗣號復齋仁和人康熙戊辰進士官安化知縣

陳傳經曰復齋先生詩發遠考訂博
沿著有復齋遺集禮樂全書四十卷

宿陳氏山齋

夜色涼侵簾蕭然四壁陰短牆猶月色虛竹有龍吟雲臥耽
幽徑天清空梵音唯餘元勝理習靜對遙岑

荒荒山氣白澹澹水增波野曠漁燈暗林深鳥語多傳杯依
石磴高詠藉青莎飛動平生意攬懷任嘯歌

姚淳楫

字綢雲一字壽川烏程人諸
生授職州判著水雲諸草

洞庭山翁氏煙霞閣次韻

水光山影兩悠然高閣登臨別有天松菊自存陶令宅煙波
疑泛米家船窗虛正可看雲坐榻靜偏宜聽雨眠襦襜慚余
無傑思風騷端合讓諸賢

客中題壁

行逢好景頻搜句坐對青山漫煮茶欸待羈人無別物一庭
風月四時花

王

國

字定國一字瘦
癡慈谿人諸生

鄭勳傳略瘦癡詩愛淵明漫叟而不屑屑於時藝得血
症億甚鄉前輩周因嚴往視見其執卷臥牀上謂病至

此尚把燭時文耶奪之乃黃勉齋撰述朱子行狀奇之
病痊與之語道學淵源及律厯地理之學無不研究後
主德潤書院學者翕然宗之所著存
瘦癯蛻古詩選一卷餘多軼不傳

紀夢

昨夜夢何奇明月懸天中是月大一頃騎馬馳太空右肩肩
丈筆足下起長風揮毫明月上旋轉輒一通字畫龍虎狀磊
落寫心胸俯視俱茫茫一喝天地聾

除夕

薄暮門早閉晴光照我楹庭樹枝蕭疎歸鳥啼數聲我復何
所事掩卷有餘清少女才彌月置膝看笑嗔老妻循風俗鄭
重辨盤飧勿云無下箸卽此已足珍況復免疊恥濁醪盈我
甌兒列在左右把瓊競共斟其意敬耶孃怒喝恐傷情居然
成狼藉逡巡夜已沈爛熳孩童睡推扉銀河橫

屠可播

字嘉穀一字法田鄞縣人貢生著有遂初堂詩略

華日南曰法田仲兄可堂宰雲南遠宦且貧祿養不給法田稱貸以益得父歡心及可堂歿于官復經理其後詩尤工近體著有吟社草永感草閩遊燕遊慎遊諸草老悟編皆佚

抵滇南

萬里滇雲望眼賒郵籤屢月得停車重林密箐行偏穩賓市蠻村看亦嘉開闢山川懷古蹟團圞骨肉聚天涯會城咫尺行程晚暫息勞筋向酒家

張定陽

字西陽鄞縣人諸生

五亭驛

坂折疑無路雲開別有天山圍翡翠障地湧火珠泉古驛明殘月荒城宿野煙旅懷多不禁秋色爲誰妍

胡仲常

黃巖人

俞實華曰仲常託業裁縫為市井雜流而所弔家烈婦死于邑差戴德一事敘次頗詳盡存之

弔家烈婦

君不見東江之水清而冽東江之婦貞且潔如何貞潔婦夫
婿性驕奢火符驟下國法加縣差來里魁似虎擎票索錢一
何怒釵環任取猶未足日暮雄狐逼獨宿霜刃斷喉血染牀
可憐明月照清霜今古阿誰身不死千秋烈婦首猶香

王武功

字維榮
杭州人

雲螭齋詩話毛先舒稚黃陸進盡思王武功維榮翁必
選尹若徐逢吉紫凝沈錫輅六飛趙沈壘漁玉吳允嘉
志上周京敷文錢璜右玉翁必達超若朱宏直廣平月
崧岑年王嗣槐仲昭沈可璋孚遠傅光遇介菴解天泳
逸菴陸曾禹汝諧徐張珠月涵釋顯
鵬彬遠共二十人著有西湖讌會集

六月四日露香亭同人雅集

夏日尋幽境紆迴到薜蘿亭空涼氣入竹密晚陰多座滿金

閨彥詩成紫邏歌論交洽蘭芷訪勝有羊何疎樹懸新月遙
峰疊翠螺花香當戶牖鳥語雜林阿大雅歸吾黨清流歎逝
波疎狂真不俗漸覺醉顏酡

陸

璘

字湘遠一字楊菴烏程諸生著半畝閒集

施嵩曰楊菴家貧就幕其詩多紀游之作子方山寶持兩學博俱善詩

元旦懷半畝間

旅況一年始鄉心半畝間徑紆緣野曲門靜帶雲關凍樹春
歸碧晴山雨後斑數枝梅倚月況待主人還

黃龍眉

字公翊一字海門海鹽人海寧籍康熙甲戌進士官翰林院侍讀學士著威鳳堂稿

楊秉初曰海門先生從學於先高祖崑來公著作甚富詩亦爽然成集今散佚殆盡從廢簾中搜存之

泊臯亭山下贈佛上人兼訂後遊

山色何渺茫星光逗如月俄聞清磬聲知是安禪窟剝啄叩

柴扉烹茶煮薇蕨坐久說無生松風蕩林樾高臥白雲隈客
夢互越忽更問桃源中桃花幾時發

飲涉園贈別張葭士

春風何造次落花紅滿池花落有時盡相思無盡期爲君引
滿三千斗知已如君得未有相逢一笑復幾時月明倒挂溪
前柳

沈寧遠

字靜師一字寓巖海寧人歲貢生官宣平訓導有寓巖集

樵石詩話先生簡默恬退客臺許時菴先生致政歸里館之家塾愛重之常謂客曰我與寓巖處數年若未嘗入吾座者足爲寫照矣

雨後行菜圃和雪光韻

墪土已逾旬寒蔬應爭長如何雨意慳蓼灘臥雙槳方愁食
案空鳥有餘鼠壤日暮溼風繁衰柳互俯仰簷溜聲徹明大

惻然雲想小圃青蔚然無乃雞豚饗乘間命秋屐獨立成幽
賞溪清雁寫影稻熟蟲騰響野老道俗情聞之爲撫掌菜把
不需人何心大烹養

兩浙輶軒錄補遺卷四目

陸宗楷 羅儀 曹廷樞 許晉 馮畿

范璨 陳克鎬 徐煥然 吳應枚 蔣振鷺

閔廷樞 包維濤 王雲廷 董良弼 趙毅業

沈天機 董炎 董承勲 董文白 陳齊襄

陸祖錫 吳嗣爵 周霽 戚敬言 沈世楓

徐以煊 沈孟堅 王應綵 朱敦棣 沈燮文

錢鴻基 金張 周經邦 孫驥 錢界

盛熙祚 王璣 汪廷英 李光昭 董承亮

褚綸 董華 沈莘士 葛覃 朱綸

褚國輪 陶及申 沈廣煇 姚世鍊 董彙吉

錢源來 萬光謙 陳芝光 沈嘉轍 王作人

邵岷 董燧 朱楓 張元龍 滑彬
查基 俞珮 楊知 郭廣琛 沈甲
張宗松 汪上堦 張蘭 史倫 錢匡
陳思湄 馮嗣京 黃昌瓚 盧壽朋 潘作梅
戴滋 胡泰 董兆元 閔振武 楊汝霖
張逸 董斌 壽鼎 應煒

兩浙輜軒錄補遺卷四

陸宗楷

字鳧川仁和人雍正癸卯進士歷官兵部尚書

俞寶華曰鳧川先生官京師幾四十年引掖後進頗借牙慧不愧風雅總持惜遺集失傳僅得題贈詩二首以存其人

題許氏連枝圖

高陽才子里譽重許文休仗義敦花萼高情指麥舟

題汪氏雙節詩

高行傳來自越江誰披彤史紀鄉邦人誇虬幹連枝茂詩愧
龍文百斛扛存歿從知心不隔零丁偏恨影成雙翩翩雛鳳
蜚聲後想見丸熊夜雨窗

羅

儀

字易門一字二峯山陰人雍正癸卯進士官青州知府著憶存歸田等稿

吳門晤同年翁樸存廉訪

邗江纔返棹茂苑復停舟
帆落楓橋月筵開牛渚秋
三年懷舊雨一夕話新愁
無復彈冠興蕭蕭雪滿頭

曹庭樞

字古謙嘉善人雍正癸卯副貢生
舉博學鴻詞放歸著有謙齋詩稿

歸途雜咏

三年雕楮悔徒勞局外輸他褒
手高調鼎任從充鼈臝轉輪
空用覓稀膏酒盃愁照離人面
草色寒侵去日袍堪歎成都
五千字長楊不賦賦離騷

廣陵舟次畱別厲太鴻

君暫停橈廣陵驛去畱意緒總難堪
雲山一路愁兼別風雪
三年北又南獻賦漫勞尋往事
挑燈不盡接深談歸來好傍
西溪住筇杖櫻鞋取次探

春雨和錢嶼沙編修韻

兩兩溪邊水鳥呼
漸看檐際濕模糊
憑欄花重紅疑滴
隔座山橫翠欲無
吟苦縱愁春冷淡
病多偏穩睡工夫
卷簾自愛虛無景
未要瀟湘入畫圖

許

晉

字自昭又字漱溪德清人雍正癸卯舉人官安徽潁上知縣

低田嘆

低田嘆嘆低田陽侯怒何喧闐正陽之西千百頃時時蝸舍
泣蛟涎側聞三慎坂上與淮河連所納或暴泛平地干涸涎
江星動搖圓景匿麥苗僅露青青尖乘船入田淚如雨仰面
獨看滄浪天兩秋稔黍較豐稔綢繆未雨誠宜先我欲作隄
障瘠土稍蘇民困拯潺湲不然或開鄭白渠渠水灌溉資旬
宣此念抑鬱不得展雨暘時若祈新年

馮

畿

字孟三號幼茗平湖人雍正癸卯拔貢生著有香草樓集

兩浙輶軒錄補遺

卷四

許晉馮機錢志期

二

張端門傳畧云明經年十一學為詩文綽有才情及壯肆力於古入洛如詩社有聲帖括家言亦以古文法行之受知于中丞朱文端公膺選入成均年逾耳順矣仍歸而優游里門二十載以終所刻香草樓今文鈔諸太史錦序以行

讀曲歌

一物比爾我樺燭金風侵滴滴妾多淚轉轉郎多心

聞歡有新知儂前故低徊鼻爐消鳳炭外熱裏成灰

錢志期

字于高一字玉峯象山縣人雍正癸卯拔貢生著有嘉會堂詩藁四卷

楊秉初曰玉峯先生為象邑望族工詩善書兼精岐黃遇貧病者輒自往診視與以藥不計其值鄉里至今德之其孫心溪聞見博洽善承家學家故貧徧游幕府名公卿爭器重焉

梅谿

策蹇東郊隄相將度銅溪春風抑何早梅花盈山蹊欲訪隱

君子香雪林空迷

讀真西山先生集

文忠崇理學功可翼尼山經術相參用醇疵慎探刪詞追風雅始體在典謨間讀罷神尤悚高踪未易攀

范

臻字電文一字約軒秀水人雍正甲辰進士官工部侍郎著有露涓編

迎鑾詞

敷天哀對及春融遐邇無分漸被同江北江南遊豫徧翠華便指浙西東

陳克鏞

字芑豐一字柳塘海鹽人雍正癸卯舉人官陝西華陰知縣著有柳塘遺藁

陳傳經曰柳塘從祖罷官後家居十數年乾隆癸卯重赴鹿鳴年八十許

南征雜詩

朔雁隨鞭影秋深南向飛七年九折險萬里一身歸憔悴征塵色淒涼旅客衣繳矰何所慕好息漢陰機

兩浙輜軒錄補遺

卷四

范臻 陳克鏞 徐煥然

三

嶠函雄自昔風雨壯乾坤河勢隨關側山形抱岳尊
繭絲新製邑虎帳昨分屯堪笑一丸策卑卑那足論

廿年騎馬客今日復乘船急浪流無盡征帆退復前
旅情千里近歸夢五更連清絕衣塵少軒窗一洗然

一笑看鄰叟今朝認舊山路隨殘雪盡人共早春還
寶劍牀頭蝕朱衣篋底殷空庭芳樹老羨爾四時閑

徐煥然

字晉叔一字桐村海鹽人雍正甲辰進士官編修著桐村詩文選

楊秉初曰桐村工詩善書見畫徵錄

仲秋西淀道中

秋色溟濛出郭西柳絲含霧幕清溪輕雲閣樹不成雨
山鳥一聲花外啼

夜過滄州

歸思落扁舟秋風苦滯留碧天渺無際銀漢澹微流月色一

江冷蟲聲兩岸秋酒殘渾不辨愁絕過滄州

吳應枚

字小穎一字穎菴歸安人雍正甲辰進士官大理寺少卿著有客槎集墨香幢詩

吳興詩話少廷尉甲辰翰林視學雲南升學士奉天府尹降通政叅議鴻臚寺卿大理寺少卿工畫

題庶子張鵬翀進春林淡靄圖

林外霏微靄四垂花含烟潤柳舒眉展開一幅畿南景正是

深宮望雨時

蔣振鷺

字子羽嘉善人雍正甲辰進士官翰林

嘉善縣志子羽博通羣籍兼精八法與高太史輿陸太史奎勳以文章行誼相砥礪舅氏錢恭格聞其賢招課

其子

羅星臺

千條銀練駛清流砥柱功憑指顧收老樹干霄餘蔭遠行人

莫只說春遊

閔廷樞

字星璇一字心泉烏程人雍正甲辰副貢生官工部屯田司主事著有北軒吟藁

茅應奎曰屯田初筮仕得銀州之寶豐濬渠募屯不惜盡瘁迨晉水部又奉命督綏遠城風霜邊徼從事獨賢歷五載牽連被劾幾至破家因請急歸吟咏自適詩雖不多然真率朴素如其為人

嚴維懷二兄歸自遼左作此寄贈

色喜金雞下日邊只今謫久始生還
兩情繾綣八千里一別迢遙二十年
悵望歸途猶雨雪感懷往事似雲烟
白頭何幸重相對午夜挑燈話未眠

包

濤

字春河一字梅嶼錢塘人雍正甲辰進士官甘肅慶陽知府著梅嶼詩存

餞張爾默歸澄陽

客散庭空獨倚闌臨風聊復盡盃殘
浮名此日真蛇足入世多年亦鼠肝
去住但隨荷一葉平安剛剩竹千竿
歸心早動

歸期晚啣尾輕航下石灘

蔡維熊

字星若一字秋澄嘉善歲貢生著之江草

俞寶華曰秋澄子爲蘭圃殿撰贈翁詩極清麗見絮吳羹詩選

過嚴州欲之淳安訪方樸山前輩風阻不果賦此寄懷

先生元晏文章伯高卧南山發古香一自柴桑解組迅翻教
通德授經忙帳中請業森金鑄篋裏抄書富石倉物外亭邊
秋正好因風遙憶魯靈光

王雲夔

字文山錢塘人雍正丙午舉人官國子助教以子際華貴贈禮部尚書

汪嘉穀曰贈公累世積德其家訓篇首云人家出一跡喪元氣進士不如出一培植元氣秀才官助教十數年著有太學十詠

游紫雲洞次徐立人韻

山色青葱雨乍晴探奇試共躡崢嶸樹欹絕壁空餘跡鳥嘯

巉崖不記名石氣拂衣丹竈冷澗聲落戶月池清薩公遺句
依然在底處遲迴欲緩行

董良弼

字繡原一字守齋烏程人雍正丙午順天舉人官安徽英山知縣著守齋詩集

梅堰雨泊

林昏鎖暮烟帆重衝微雨停橈沽濁醪村舍稀可數一犬吠
人聲漁歌沒前浦

趙毅業

字遠亭會稽人雍正巳酉舉人

關山月

青海城頭月征人拭淚看墮來金甲冷憶得玉樓寒天遠光
逾濶山高影易殘昨宵傳埃火徹曉照雕鞍

沈天機

字星杓石門人雍正巳酉舉人官河南臨漳知縣

吳曾貫曰星杓爲吾邑耆宿最好吟咏按年一帙今節錄之以誌其概

罷臨漳任自遣

世人底用慶彈冠最好無如初罷官避去急流千百丈交還
遲日兩三竿田園已廢難重問書卷雖空許借看更喜杏花
深處過殷勤父老勸加餐

董

炎

字蘇門一字堅齋烏程人已酉順天舉人官河南綏寧知縣著有堅齋集

董文白序畧六兄燕門研求經史詩宗盛唐任綏寧安撫苗搖均其產役每出苗民必叩首曰微董公吾等無遺種矣立祠祀之

光福道中

畫舫翩然任往還西風一夜水潺湲平明掃盡千林葉天與
詩人飽看山

董承勳

字對揚烏程入雍正己酉副貢生官長蘆鹽運使著芭堂詩集

送堅齋六兄復任綏寧

悵隔五千里分攜第七年
豪吟秦塞月清夢楚江烟
乍聽聯床雨重登上水船
僕夫催去急離思滿樽前

董文白

字子猶一字洛菲又字易菴烏程人雍正己酉廟天副貢生官福建惠安鹽大使著有易菴詩集

贈燕

前年燕客我歸家
社日石榴爭放花
低掠池塘風乍軟
斜穿簾幕日初斜
今年燕歸我爲客
易水燕山愁萬疊
曲裏離聲咽鷓鴣
夢中岐路迷蝴蝶
悠悠身世兩飄零
地北天南迭主賓
何處菰蘆容寄食
誰家院落穩棲身
喚回午夢呢喃語
似訴平生別離意
紅錦曾無繫足詩
烏衣剩有傷心事
雄飛雌伏總休論
歸去江南度好春
爲掃舊巢畱待汝
重來休怨阮家貧

舟抵杭州

江路迢迢緩客槎蓬窗俯仰足烟霞吟消紅日長爲客看徧
青山始到家擬倣白公題柿蒂試尋西子泛荷花塵埃浣盡
閒身在依舊臨風白幘斜

陳齊襄

字明齋山陰人雍正己酉舉賢良方正官江西廣饒九南道

陳傳經曰家明齋先生由賢良方正授銅仁令因火耗陋規申請豁免上官沮之遂揭部科西林鄂公制府張公奏其廉直旋以軍功復原官

詔對稱

旨游

擢江右觀察所至多惠政詩文稿藏于家茲從其孫默齋鈔存數首

庚子春重奠俞紫卿先生墓

孤塚無鄰伴野蒿來乘暇日泛輕舸春江一望如秧綠疑是
胥門八月濤

華表依然鶴不歸春雲淡沲日斜暉幾年我亦渾如舊只麼
西山賦探薇

碧血殷殷尚墓門春雲不爲散煩冤六師今駐蓬婆外應有忠魂扈至尊

山畦細路渺于川不似曾經是去年半闕殘詞那可憶重來

釃酒續新篇

陸祖錫

字念劬平湖人雍正己酉拔貢生

張庚墓志畧徵士少孤力學鴻詞著松鱗集
成均旋入錢香樹幕隨舉鴻博九月廷試報罷裁書卽
附徵士與香樹以余長女妻之徵士古文尤長駢體入
唐人勝處詩宗選今律類玉溪與從兄畏蒼人稱二陸
一日忽展卷同契有悟卽閉閣端坐八閱月而卒臨卒
語妻曰母卽蓋棺句餘妻以指探其額肌猶動皆異之
俞寶華曰念劬少孤母林授以經書過目不忘詩文數
千言立就尤擅小楷得河東家法梁文莊相國贈句新
樣從君擅
柳家是也

上華山

日出霧半消寥陽望中見鐵索不可攀鳥道通一線精神出

天表登降嗟目眩風泉灑清襟長空擣寒練忽聞玉子聲
丁四山遍尋之杳難逢松花落空院

樓前曲

樓前山色堆雲碧樓下水光橫練白眼中山水卽天涯何況
長城萬里客行行驄馬珊瑚鞭花枝幾簇隨香轡平生愛誦
荆王賦不信鄂君耐獨眠百舌無聲春欲去驚夢簸錢聲幾
處平林漠漠綠含烟春陰黯黯風交絮胡麻好種惜空分鵝
鴻香殘亦罷熏早識亭邊無芳草當年悔著綠羅裙

秋日汪息園招同茅湘客錢立之納涼金陀池館分賦
愛君池上酌殘暑忽如無況以遊踪數兼之勝侶俱翠光交
竹石清思入菰蒲談劇康駢似披襟共據梧

醒酒風湍激論詩夜月高秋來懷雁字釣罷覓魚刀露檻聞

清響槐庭說冷淘歸畱餘興在九日續題糕

戊午下第後寄外舅浦山先生

肅肅淒風報歲寒閉關聊問竹平安昂藏意氣消清鏡
落生涯託釣竿人去又驚楓葉下書來偏值菊花殘
會期共對嵩陽雪太息成言欲話難

薦牘畱名亦偶然蓬池綠水恣洄沿好將司馬春秋筆且補

睢陽世族編

睢州蔣氏聘修家乘

得意三冬花獨秀感恩一榻去常懸

含情爲問梁園柳可憶鄒枚竝馬年

吳嗣爵

字尊一 一字樹屏 錢塘人 雍正庚戌進士 歷官河道總督吏部侍郎

府志嗣爵官淮陽道時洪澤湖決制府高公議開壩公曰減漲誠便如下河百萬生靈何持不可戊子黃水秋漲大溜直逼徐家莊嗣爵撤蓋端坐堤上于大風雨中當其衝屬吏勸退不顧逾時溜勢歸中泓若神助然擢總河開放引河移建木龍任事十餘年下河豐收上賜詩褒美之

恭和 御製原韻

治水貴審機收效乃益信澤國近安居良由河流順回溯大
潦時受患在轉瞬溢水下沮洳如牛豚上僨司事計補苴徒
知事後趁 睿鑒洞源流悉屏羣議紊清口量水拓弗使
盈科進壩工費縱重不致爲民靳底定賴萬世要非廿載僅
廼民餘蓋藏早已忘歲饉古以粒食稱視此應退遜我
皇猶勤思察邇更好問

周

霽

字甘雨錢塘人雍正庚戌進士授修撰

俞寶華曰兩甘殿撰詩輯前錄時遍訪不得茲
從程廣文榮處得之廣文母爲殿撰季女名芷
女史周芷曰先君詩三首乃平昔熟聞因事特傳者謹
從原稟錄出先君及第已踰強仕口占一律感盛遇紀
異數也先是未第時司寇勵公廷儀知先君兼精法律
延入幕府會石門逆書事發以先君言得解免者二十
四人故迄今可得詳述焉至視學關中考棚有官吏之
傲蓋爲巡捕某作也先君一生好善多隱德不欲人知

茲其可知者耳

及第口占

爲領羣仙拜

紫宸親承

天語出絲綸顧名恰喜爲霖協

時苦旱唱名得上甚悅

識面還疑肖

象眞

肅承敬對日臣今日初覲

上問朕似曾見過汝

天顏豈有文章能報

國要

非溫飽急謀身頭顱如許登瀛晚

時年四十有七矣

慙愧臚傳第一

人

考棚倣官吏

有妄希夤緣者私諷家奴余憫其愚也思曲宥而善

全之然不可不明示懲倣也乃於覆試諸生日設瓷

碗公案上注水滿之令其人捧而擲諸堂下彼則愕

然余謂曰爾惜之乎爾身之弗惜而惜此區區者乎
卒使擲之復謂曰一經敗壞能復全乎吾與爾猶是
也忘身殉賄直鳩酒止渴耳其人免冠謝涕泣悔罪
遂宥之而作是詩儆之諸生亦目擊焉而其諒余之
苦衷也已

美螭擬玉石清泉表潔白注泉盈螭碗捧持防顛越無心或
偶誤有心誰棄擲情事所必無智昏竟荒悖棄擲爾奚疑爾
身且弗惜吁嗟乎爾身弗惜余心憂爾不見瓦裂不復全水
覆弗復收爾身弗惜余心憂

戚毀言

字魏亭號潤艇德清人侍講學士麟祥

章有大云麟祥以事謫戍寧古塔毀言隨往寒壘饑雪
侍奉不少離及令連江屢欲棄官或告之曰獨不爲菽
水計乎乃止居常飲恨茹苦悴容寡笑食粗糲夜臥數
起撻床蓋一月無幾夜交睫也會制府郝公玉麟入

親喪言號泣乞代陳不得請遽欲引刀自裁郝公感動許

特旨放麟祥還迎養連江纔一年而卒

藤老蝶爲花圖次蔣孝廉薄韻

忽驚遲暮轉芳菲料得悠揚蝶試飛嫩色不關經雨潤芳心
亦似向春暉餘香難覓偏兜扇細粉輕拋却惹衣最惜生花
仍是夢不勞剪綵倍依依

送弁亭弟赴禾中

忍痛還當讀父書莫辜遺訓負居諸已憐寸草暉難報況是
雲飛望亦虛鐙柄呻吟悲杜甫樹風寂靜泣臯魚鵲原慚愧
鳴聲急棣鄂荆花總未舒

沈世楓

字甫草一字切堂歸安人雍正庚戌進士歷官

沈德潛序畧切堂剔釐中外明達過人治事之餘

不廢典籍才識與學三者具備詩之所以日上歟

錢陳羣序畧甫草凡題咏遊覽言懷贈答之什無駘麟之氣無促縮之音陶泳性靈一歸冲雅是非特醞釀之深益徵其所養之邃

俞寶華曰如堂方伯詩分四集曰行臺曰楚吟曰清籟曰飼鶴軒草共八卷綱名曰十笏齋詩集起壬戌年觀察大名至甲午春歸里之作其壬戌以前侍直西清舍香粉署執法臺中之詩皆不與焉蓋亦古人悔其少作之意也

邢襄早行喜有秋

露下肩輿曉氣寒林梢盡處湧銅盤蓬山翠合天光迴泝水清分地脈寬禽鳥忘機親長吏果蔬落實喜園官此邦著我渾無事穰穰春臺萬戶歡

將之任左江興庭前花木約兼示別諸昆季

徧乞花枝著意栽花時曾未賞花開十年待汝成陰後三徑容吾歸去來好護春光無剪伐未妨舊雨此徘徊王程無那

匆匆去萬里相思日幾回

梧溝道中

漢使通荒服車書共一家
狼狽無桀黠風土絕囂譁
飯稻抄雲子羹魚鱸雪花南交我屬國
聖德在宣遐

杜牧之祠

棠蔭謳歌流雪水曾刺吾湖今尚祠祀
桐鄉俎豆又江垓江山若止詩
篇助遺愛何能到處傳

癸未皖江寒食

江城春過半草草握蘭天
細雨迎門柳輕風下瀨船
壯心隨節冷老眼照花然
偶得閒中趣何須白打錢

徐以煊

字養資一字潤亭錢塘人雍正庚戌進士官內閣學士

杭堇浦字畧曰潤亭以庶常晉學士奉父歸籍起擢閣學視學畿輔左遷太常寺少卿乞歸清風亮節爲鄉黨

所矜式

駕駐杭州恭紀

天顏有喜奉慈顏
虞帝周文莫與班
六十載來循典則
三千里外歷湖山
卽看巷舞衢歌處
都在祥雲慧日間
感極敬陳時邁頌
屬車夾道望重攀

沈孟堅

字研圃一字賦亭德清人雍正庚戌進士官江寧知府

湘江夜月

誰歎擊筑者把酒獨悲歌
雁落平沙迴鳥棲
子夜多雲開衡岳月
風濶洞庭波
學賦三閭近江花愧欲枯

過洞庭湖

三湘俱北去一折洞庭西
碧落雲無際芳洲草自齊
粵波宗澤國巴雨蹙金隄
萬派蒼茫裏遙岑指五溪

題戚弁亭明府秋水蒹葭圖

岸幘疎林落照前分明色相盡毫顛漫吟道阻風人句且誦南華秋水篇

漁莊三兩出烟汀露葦風楊岸岸青見說幽棲求勝地誅茅應近鏡香亭

王應綵

字天章一字萊堂桐鄉人雍正庚戌進士官禮科給事中著清慎堂詩藁

陳傳經曰給諫中歲鰥居室無姬媵退直後一編靜對如定僧處女家句山太僕贈詩云不買青衣供夜直每披黃卷忍朝飢志其實也

游龍泉寺

傳聞古帝子置屋此山幽崩石隨雲落飛泉帶葉流窗虛常聽雨樹老欲驚秋不爲牽人事應須十日留

丁丑除夕示遵兒

一昔纔周甲匆忙又歲除舉杯聊共飲宵構定何如舌在無憂餒頭童欲遂初歸山從此決不復問田廬

朱敦棣

字萼友一字芑村烏程人雍正庚戌進士官戶部主事著有紅近軒集

汪嘉穀曰紅近軒集見邑志蕨塘太常輯吳興詩話未見全集茲從他處構得并得思廬集一卷亟爲采錄存之

臥佛寺

遠役如行脚幽蘭足暫趺津梁疲此子歲月老吾徒選佛逢場爾浮生與夢俱夕陽在殘路且復坐斯須

曉發桃花口

春曉桃花口征裘不耐寒磚城披霧出星影及晨殘小市千人集支河兩大寬往來但如此行路未云難

陳瑄開運河議從海口分支河

兩丈許

沈燮文

字理江一字鶴園海鹽人雍正庚戌進士官河南桂陽知縣著鶴園詩集

汪嘉穀曰鶴園赴桂陽任二十七日以疾卒于官所著有湖廣省志

歲暮

神仙富貴惜蹉跎一載韶華瞥眼過年事無錢隨減少鄉心有夢更增多詩逋未了兼書債茶祟方驅又酒魔莫謂他鄉岑寂甚隔牆猶聽雪兒歌

步二兄郴州寓咏

孤燈獨宿草堂涼夢裏家山日正長鴻雁一聲霜月冷始知身是客他鄉

錢鴻基

字肇邠一字韋軒象山縣人雍正乙卯拔貢生官泰順縣教諭著有棣鄂軒詩草

石門洞謁誠意伯

石門仰崔巍山坡構庭宇冰雪寒雕櫺烟雲護翠柱遺像瞻

劉公綸巾揮玉塵有明三百年于此著神武誠意諡何榮勛
高列爵五剔薜蘿殘碑矗矗狀奇古我先司寇公與師同夾
輔小子雖不敏不敢忘所祖再拜奉瓣香惟師尚鑒俯颯然
山風來靈旗捲亭午

金

張

字介山錢塘人諸生
著峽老編年一鈔

何琪塘栖志峽老家貧喜吟咏生平酷好楊誠齋詩所
作多效其體因榜其室曰學誠齋齋中書畫古器位置
雅潔名流卜祔過從無虛日湯少宰右曾贈
聯句云有人甘隱偕春米與世忘機且灌園

馮園看玉蘭

不須有葉亦成陰合抱猶餘高十尋圭璧器搏爲玉樹萬千
蘭聚作香林雲開耀日寒光亂風過兼天雪浪深俗紫凡紅
寒窘甚一年一看寄遐心

周經邦

字理齋錢
塘人諸生

汪嘉穀曰經邦爲句山太僕受業師此作附見道古堂集

山塘泛舟同堇浦作

景入初冬稱晚游蒼深巖壑起人愁千秋陳迹歸金虎十里橫塘見玉鉤古塔靜看棲怖鴿畫船清似泛輕鷗鳬溪尚有灣環路夾岸蘆花盡白頭

孫

驥字浩源一字晴山仁和人著霞蔚堂集

楊秉初曰晴山詩少作筆健凌紙中年後漸造古淡閒遠厲樊榭蘆白雲皆序其集

送友人之閩

君向閩南去我來把別尊片帆千里駛落日一江吞海氣騰朝蜃秋風叫夜猿悵然悲景物回首憶鄉園

遊寶壽寺

微雨不滑徑恣爲汗漫遊羣峯藏古寺萬竹抱層樓野鳥聲

方碎溪花爛不收明朝山下去回望白雲悠

錢

界

字主恒嘉興人官施南府同知著知非草

嘉興府志界太傅陳羣弟以陳羣舉發陝西歷知醴泉寶鷄吉水廬陵等縣擢歸州知州攝蒲圻以施南府同知卒于官界所至有惠政不名一錢卒後囊橐蕭然蒲圻之民立祠祀之

家大尹雨中自雙港至黃溪同寓有作屬和

野航通近路問渡向前溪捷便憑帆脚艱難惜馬蹄驟來新漲濶平眺晚烟低只當遊山約茅簷共借樓

重至興山

高陽存故里長吏得重來竹馬三年別雲光四面開山花如舊識棠蔭是新栽獨上城南嶺王嬙有廢臺

盛熙祚

字西京一字晴谷嘉興人官廣東龍川令著春草藁

俞寶華曰晴谷大令爲丹山先生第三子雍正六年以人才荐舉得官詩有家法膠州高鳳翰爲之序然序所

有折輜軒餘補遺

卷四

錢界

盛熙祚王璣

七

云於風鳶詩見眼孔於懷古詩見
宵次今集中已散佚無復存矣

春水

溶溶依曲渚脈脈自三巴浴鳥先知暖廻風碎作花橋平妨
野艇岸近失晴沙薄暮寒潮急漁燈隔浦家

鳴謙道中

峻嶺勢崔嵬寒空鳥道回雁聲依塞近秋色入關來地險憑
山磴碑殘卧草萊長林堪繫馬懷古獨登臺

王

璣字象天一字玉亭秀水籍錢塘人官戶部侍郎著有復初集

戚芸生曰外祖司農公由明經薦舉起家真定令數歷
中外所至有聲後以少司農出理江蘇巡撫事不數月
罷歸乾隆
辛未恭迎

聖駕南巡得
旨授鴻臚卿職銜後數歲乃卒生平詩不多僅存復初集卷

潮海菴

蓬萊山側寺徑曲自逍遙閣上來新月牀頭聽晚潮鯨波翻

峭壁雪浪湧天橋天橋在觸目皆空相烟霞散九霄

汪廷英字掖清一字抑齋仁和籍桐鄉人官福建興化府同知著鼓山紀遊九鯉湖紀事抑齋詩鈔

汪嘉穀曰興化舊有嚴滄浪詩話樓先曾祖攝太守篆嘗出俸錢修之暇日與郡之名流登樓談藝或游鼓山

九鯉湖諸勝一流連觴咏其風流映照一時云

抵任仙游

親承 天語度仙霞余謁選初授翁源知縣引見改仙游判牘無多早放衙

花歷四時稀雨雪泉分九滌長桑麻殘碑可辨君謨塚廢井

相傳漁仲家蔡忠惠鄭夾際廬墓猶存最喜民風如太古朝耕夜讀是生

涯

將抵三山題鄭氏池上壁

片雨夕仍歇蒼蒼晚色清巖雲斷遙影野鶴響空明秀木幽

亭得閒門秋水生繩牀休更掃明發又南征

重葺嚴滄浪詩話樓落成攜賓僚置酒其上

高閣開尊愜勝遊清明吏隱此勾留驅車又問楓亭驛

雍正丙午

先大夫奉命巡視臺灣余今復宦於閩移榻初辭鶴聽樓

仙游署中樓額鶴聽

檢點騷壇

謀小築招要詞客說前修論詩人往遺風在故宅依然枕碧流

李光昭

字少逸號潛崑山陰人官順天玉田知縣

商盤曰先生立品敦行喜吟咏著念莪堂詩潛崑集餘

載詩數首

俞寶華曰潛崑先生娶于吾宗其文孫卽松雲太守也

永定河

不信桑乾水奔流似浙潮排空飛赤雪觸岸捲冰綃林木聲

皆應魚龍氣不驕星槎如有便矯首入烟霄

哭方竹書

未得扶搖奮羽翰七年憔悴老桑乾宦情澹似陶元亮詩思
清如陸務觀是處何妨埋岷嶲異方誰肯念孤寒高堂垂白
桐江遠廉吏焉知身後難

董承亮

字電章一字益齋烏程人雍正丙午副貢生著有益齋集

江行篇送謂瑄弟之江山

春風曾作三衢行江勢正落潮初平沙汀一望淨如洗水碓
百尺危將傾五更潮動舟始發伊軋滿江聞櫓聲曉起推篷
雙眼豁吳山越嶠分崢嶸矮屋疎籬何處村千樹萬樹山花
明牛羊點點散沙際芳草淒淒隔岸生海風萬里吹白日洪
濤湧起孤舟輕布帆曉挂錢塘岸木樨暮下桐廬城

江船無纜以木

爲椿欲止 桐江西山巖州路中有巖灘奇絕處兩山約束江
則下之

水流一棹直入山中去高山連綿七十里往往陰雲白晝布

山根有石插中流水石鬬爭聲憤怒萬道飛泉挂碧峯一路

春禽啼不住釣臺高峙西山椒孤亭縹渺出烟樹俯瞰大江

千仞強疑是傳聞有謬誤合江亭畔水屈盤江流百折多廻

瀾危崖石路步步險絳路多出石壁上曲岸濤聲處處灘大船小船

不可數絕流橫渡雁行序有時乘風乍星散忽上急灘復蟻

聚屢訝白雲濃頻驚山色紫蘭谿山多紫色風前一片菊花香雨後

千村碓聲起漲水浸空濛浮橋卧若龍曩者嘗問鹿溪渡此

去百里長波通我自歸來卧篷牖夢裏猶聞江漲吼欲將弱

筆寫奇觀才薄空成屢搔首送君此去正清秋翠壁澄江入

君手知君舊富八斗才烟霞揮灑夫何有

褚

綸字嗣洵一字南坡錢塘監生

楊秉初曰南坡博學工詩遊京師入成均
茶陵彭大司徒長白鄂大司成咸器重之

漁父

羨爾江湖趣生涯一水邊利名無復夢放曠保其天興至垂
竿釣閒來醉月眠輕舟隨所適鷗鷺泛前川

夜渡錢清

柔櫓輕搖欸乃聲波旋風逆近初更方嫌雨向愁中滴又奈
雷從夢裏驚繞岸煙雲經越地沿堤燈火是錢清舟中攜得
村沽滿何患今宵夢不成

童

華字心機一字赤城會稽人貢生

紹興府志華年十二入郡庠屢鄉舉不第乃從事幕府
後與修大清律受知于朱文端相國以知縣薦會怡賢
親王在直隸問公灤河形勢公條對如指掌王以爲能
奏知平山縣縣災公不待報遽出倉穀七千石貸民爲

世廟特免之擢知真定府權按察使後移蘇州蘇民德公之

總督某所劾
深比前明
況青天云

陳傳經曰心樸太守善治下不善事上發奸如神尤長
水利正所謂以人存詩者然所著赤城集亦自雅贍可
誦

題陸起瞻畫卷

陸生上新書殿中呼萬歲豈唯羞增伍塵糠視高惠再麾使
南粵尉陀不稱帝橐載黃金歸徜徉白雲際古稱天下士其
出爲玩世達人貴推移與物無凝滯起瞻真率人虛衷舟不
繫青翠織華裾侯門時一曳當其憤嫉時曹黃直奴隸須臾
恣談謔融融如春霽行年垂耳順漸作歸田計錢塘潮似雪
湖上山如髻秋風千里葦春雨桃花鰕人生行樂耳莫待貂
裘敝君來倘可期吾駕亦行稅山陰至臨安王許曾修禊相

與拾瑤草操此爲左契

和劉戒謀見寄原韻

筆牀硯匣擬全焚
瓦缶黃鐘總不聞
踐雪未慚東郭履
還鄉豈畏北山文
何人自立青油幕
有客猶書白練裙
空使少時豪氣在
秋霜入鬢已三分

沈莘士

字穀園
秀水人

俞寶華曰穀園嘉興府志稱其有新溪詩文鈔十卷又有郭居詩話若干卷惜書未之見僅從所知集中錄詩一首以訪梗概

重過清涼寺哭毅安上人

楚客三年憶別顏
重來飛錫入雲閒
經聲繚繞香猶爇
松影扶疎鶴不還
來去自然和解脫
唱酬邈矣破清閒
獨憐垂老交遊盡
相對無人話故山

葛

覃

更名洪業字方夏海鹽

馬寒中序累方夏文學北宋詩宗晚唐實有神悟非
關貌似精篆籀行楷不輕落筆寸縱尺紙人爭藏弄
祝兼山曰方夏鐵筆初法三橋後入蒼渾得漢刻精意
其贈余句曰若爲探源到秦漢終嫌煮石太肥甜深微
之論非消息斯
籍者不能道也

孤鶴咏

硤石周孝廉宗彝與弟諸生啟琦同被難死闔

下與僕作伴益孝廉園中物也離礎塵
甌間數年羽毛盡黑僕卒鶴不食死

忠義本天性無分人與畜不見周孝廉有此鶴與僕孝廉死

矣爲國殤闔門盡節池中央僕去無歸草結屋鶴飛忽下松

爲糧僕長號鶴高唳麥飯朝朝向空祭僕願與主守忠烈鶴

願與僕同死生一坏黃土兩忠骨誰爲礱石鐫碑銘雙峯捐

雲夜清耿月照遊魂憩峯頂飛來獨鶴斗牛寒長唳一聲動

林影

朱太史曝書亭小坐

溪南太史宅眞作野人家結屋竹千个爲園水一涯客來先
問鶴童去但澆花小坐不知晚風亭捲幔斜

朱

榆

字岑來一字青岑錢塘人諸生

汪嘉穀曰青岑有志實學獨居一室不解衣就寢者三年家積山先生贈句云一榻清於打坐僧蓋紀實也年七十卒詩刻排山小集後

徐村晚歸宿松林灣村舍

春入郊原好扶筇任所之一叢花隱屋到處水平池風磴疎
鐘遠雲山落日遲淒迷歸路杳夜月宿茅茨

西齋閒詠

俄頃陰晴變蕭齋暑氣微水昏烟欲上雲破雨猶飛欹枕憎
殘溜鈎簾又落暉衰年甘屏跡惆悵昨還非

褚國輪

字嗣恂錢塘人貢生候選同知著有南坡集今古堂詩存

楊秉初曰嗣恂家貧力學事親以孝聞

聽歌

紅樓歌板動離情一串珠圓雛鳳聲惆悵夜深人不見花堦寒漏滴三更

宿御方菴題壁

晴巖飛瀑下簷前蕭寺依山不計年翠竹四圍藏古佛綠桑一帶繞平田霜鐘敲醒三生夢月鏡明開萬籟天悟得釋家微妙理便思芋火坐蒲團

陶及申

字武南會稽人貢生

紹府志及申寄籍南昌家多藏書足不出戶工詩文與俞忠孫齊名撰越中明末殉義傳值年衰病目口授其子奕魯奕魯死復與疾過忠孫口授使續成之所著有四書博徵百二十卷紀元本末十八卷筠丁詩文十卷

寒食上塚

白楊黃土一鈎斜置塚何曾有萬家野骨猶思澆杏酪香魂
依舊蕩梨花烟消縣上傳遺俗夢醒人間隔少霞古往今來
多似此鈿車空自鬪繁華

沈廣焯

字東臯海寧人諸生有漁邨小草

樵石詩話東臯近境有不堪爲他人道者顧其詩和平閑散可登古作者之列讀書研山堂湖水環門略約通徑庭栽疎樹牖落山光雖近于市囂塵不到詩多七言而絕句頗近石湖懷人

遠寺鐘初靜懷人在獨眠寸心愁百結兩地夢孤懸竹響風
疑雨燈昏夜似年忽聞征雁度嘹唳叫霜天

園居積雨雜詠

草閣疎簾不上鈎雨寒重整木綿裘窗臨曲沼觀魚樂樹墮

危巢替鶴愁避世何須昏嫁畢耕田且為稻梁謀青山近戶
雲遮斷旋擬浮家買一舟

地僻元無一事忙但成懶慢與清狂樹堆嫩綠風過滑溪受
殘紅水帶香盛世功名輕管樂平時談笑過求羊苦思欲作
愁霖賦筆已拋疎研又荒

姚世鍊

字念慈一字改之歸安人雍正乙卯副貢生舉博學鴻詞放歸

汪嘉穀曰改之舉鴻博以病不與試丁巳補考復報罷後以鄂西林薦與修三禮

南歸留別

一寸心香冷復溫縱非惜別也銷魂無才會飽侏儒粟有夢
重排金馬門世上敢言青眼少山中猶覺白衣尊文章報

國談何易身在終須答主恩

董彙吉

字泰茹一字淳菴烏程人雍正乙卯副貢生

歐餘山尋王右軍飲酒處

嘗讀魯公石柱記臚列吳興名勝地就中指出歐餘山云是
右軍游歷處右軍瀟灑誰與論謝東山外更無人致書相戒
棄不用區區殷謝徒虛名臨池學書餘技耳猶傳硯墨漬池
水蕭統悞遺修禊文昭陵永闕蘭亭紙竭來守此郡情與雲
山親山靈寂寂幾千載右軍去後山名存想見遊屐此徘徊
亦有名士相追陪興酣西望烟雲堆羣峯燦若芙蓉開清思
健筆摩不盡聊把閒情付酒盃烏亭何處尋遺跡千年事往
空傳說山平如臥枕溪流長與弁峯道峯爭崢兀嗟此山水
窟勝境何地無雲林漠漠山峩峩不遇右軍其如何清湍修
竹空荒蕪

錢源來

字清許嘉善人諸
生著攬雲軒詩鈔

沈德潛序略清許詩取材淹雅一歸繩墨

融融樂易煖然如春蓋詩品中之正者
俞寶華曰清許幼有聖童之目父佳訓有藏書數千卷

欽定別裁中

趙忠毅公鐵如意歌

琉璃蓋匣古錦縫雲霞
瑟颯纏蛟龍中有如意光
熊熊并鐵百鍊蕃磧同橫
几二尺健且雄精氣隱躍
騰長虹純鈎巨闕干莫鋒
當此未足稱良工土蝕苔侵
幾年世落泊猶存數行字
細看歲月自前明銘識分明
趙忠毅維公剛德本天畀忤
璫純忠青史記我祖東林臭味
同通家遺事猶能憶摩挲最
憶秉鈞年節甫司權焰灼天
悲時空撫蕭條劍擿佞愁無
霹靂鞭尚方欲請知何自想得
丹忠難自置一片剛腸肯遽消
憑將鼓鐵成如意底須琢玉擬
秦皇不用鑊犀賜未央折竹

漫勞仙客幻揮談肯數握君良捧爐鼓橐皆神冶銀筆還將
金薤寫額端一物更昂藏不繪蠅蟬惟繪馬嗟公繪馬豈無
因愁殺當年指鹿人拚使更生輸石顯終思夷仲奮延齡那
堪未碎權奸首貝錦誣職先抵咎元老投荒萬里天君王甘
棄三朝耆全家荷校戍邊方一向莊浪一永昌節烈雙雙驚
殫死傷心離別痛蒼皇獨畱遺物經年月飄零賸比甘棠笏
姓氏原同日月懸珮環莫作尋常匹君不見金谷豪華石季
倫當筵擊碎珊瑚珍風流却爲綠珠死朝衣西市徒酸辛又
不見失職王敦悲伏櫪老驥歌殘唾壺缺白頭作賊太匆匆
縱有英風何足說其餘貰酒墮齒何紛紛野史長畱志怪文
如公清直古來少剛風勁節看逾新嚮往情深可若何聊將
微意托長歌爍金衆口今何在此鐵年年永不磨

訪梅道人塔步陳燭門師韻

賣卜胥塘便作家至今高致拂雲霞詩傳畫裏千竿竹易在
枝頭數點花烟老秋庭籠古橡雨添春水薦新茶裴回不覺
寒林晚獨對西風數去鴉

萬光謙

字敬懷秀水人

陳傳經曰敬懷與兄光泰齊名惜失傳今從治上題襟集選入

游牛山南溪別業

浮雲無定迹乘興涉蘭皋渚燕衝人面溪魚擁岸濤回風千
柳轉午日一亭高坐愛瓜皮艇循環似桔槔

陳芝光

字蔚九仁和人

蓮石詩話蔚九爲吾杭鄉前輩與沈欒城吳尺鳧符幼魯超功千顧意林厲太鴻同賦南宋雜事詩人各一卷各百首碎金屑玉膾炙藝林顧屬集已入四庫吳符二趙亦有專刻前錄俱已登入所遺惟沈及蔚九沈詩

樊榭曾爲刪刻蔚九更未之前聞姑選數首以存其人

青衣洞

我愛吳山巔先躋吳山麓有洞號青衣窈窕成幽谷藤蘿引層層紫紆盤石屋中有泉一窪正出流不俗冷冽沁人脾泓然清可掬小結三兩椽綠雲覆修竹信手披殘碑漫漶猶可讀側身俯仰寬誰言地形跼此洞長依然童子去不復涓涓聽泉聲令我起遐矚

沈嘉轍

字樂城一字仁和人

蓮石詩話樂城與樊榭堇浦諸公爲密友又偕同人賦南宋雜事詩人各百首樂城首倡其卒也樊榭哭之云廿載交情蘭菊在一生文采玉塵銷風雅可想見遺集樊榭爲刪訂付梓今亦不可得矣

題沈啟南冷泉亭圖次韻

爲看詩畫攬清暉遐想當年結思微古木千章陰乍合寒泉

一道雪橫飛風流已往誰能續墨瀋猶香知者稀曾憶晚來
成醉後一亭烟靄見僧歸

臙鼓

消寒圖過半鉦鼓紀年華翠袖方輕點嬌兒忽亂搗邀朋喧
委巷祀蜡開鄰家簾幙深垂處紅腔映燭花

王作人

字育才錢塘人
官黔陽知縣

詞科掌錄育才工書法初以諸生直武英殿議敘官德
清教諭例改縣丞特授黔陽令以事落職因薦起復直
隸新河令太僕卿
蔣公薦舉鴻博

黔江秋泛

越水吳山是我家依稀風景尚堪誇豈無峭壁排雲陣亦有
飛泉散雨花白鷺曉停菰岸冷黃鸝晴喚柳陰遮如何畱滯
黔江上一葉孤舟泊軟沙

邵

岷

字百峯龍游人僑居元和

雍正乙卯舉博學鴻詞
詞科掌錄百峯遷虎邱爲武生屢遊學幕薦續悞列
附生爲部所駁不准試與秀水張庚皆工五言古詩
余習曰百峯爲吾鄉
先輩最工登覽之作

五丁峽

晨鞅稅岷嶽山蹊迭迴複躡雲邁陽岑汜雨入陰谷嵐迷逕
若窮峽轉勝相逐窈窕旣尋幽玲瓏亦沿曲青林映壁丹紫
巘蒙條綠鳥哢協悲絲泉流響哀王子夜多惑聰離朱有眩
目靈異信天設開鑿寧茲俶桃源在人間風塵自迫東境過
勞夢魂情怡愜幽獨惜無鮑謝俱述作從所欲

雞頭關

征馬鳴蕭蕭澗水流潺潺水流何鳴咽馬鳴多哀酸借問客
何之言上雞頭關關門開一線羊腸裊青天上有千仞壁下

有百丈源驚風吹落石洪波盪奔湍危途無返馭微生寄征鞍靡靡遵木末遙遙至雲端故鄉杳何許天路安可攀悲來但自禁苦意誰爲言側聽隴頭唸感我涕汎瀾

董

炮

字謂瑄一字訥夫烏程人諸生雍正甲寅薦博學鴻詞著南江詩文集

陳世修序畧曰謂瑄沉靜嗜學家富藏書又嘗遊其外王父曹秋岳先生之門倦圖所藏人間不經見書謂瑄獨窺之故學有原本

書朱簡討明詩綜後

騎鯨仙人歸上界杜陵野老專詩派正嘉拆洗到天吳蒙叟撥霧長天快或者吹壑過懲羹涓涓細流失澎湃竹垞才調富海江蠅聲亦憎楚咻隘別裁何李畱其真力障百川防再壞兩公意中各有爲班馬異同無足怪合之兩美不兩傷滿幅芙蓉初日曬虞山芟柞功最宏秀水特爲補葱薤鍾譚惡

草薶掃除更護嘉穀持長械剔搜巖穴無遺珠亦念酈生侯
酈疥統觀前古及後今蠶叢闢要新釧鍛近詩充棟復汗牛
更有何人了此債

雜詩

大兒衣短後容止殊潦倒

潦倒謂蘊藉也見北史崔瞻傳

八歲讀論語半部

誇趙老其次更趨捷書聲破清早但解音琅琅不辨琅琊稻
時時弄筆墨浣壁作蛇草三男頗白皙曲踊索梨棗小雛學
人語橫莽脫襁褓篠簜相牽連不顧阿翁惱衣食念饑寒賢
愚挂懷抱婚姻正累人五岳遲幽討

曹孟德讀書精舍有感作

獵場秋草指遺廬莽蕞陰謀總讓渠欲以將軍題墓道譙東
所讀是何書

唐開成石經歌

聖籍字字皆華星大書刻石何精瑩自漢熹平訖南宋金刀
鐵畫七發劍碑板部數傳聞異篆隸蝌蚪皆殊形要將筆迹
耀古始亦畱真本開晦暝那知歲久石亦泐併無汗簡消餘
青前蔡邕後裴頤邯鄲淳偶得數字尊堯莫自餘孫達楊南

頗後出鑒賞幾見誰手拾惟有唐雕宋御筆浙東陝右垂千

齡好事傳拓開成石未下雷電逃六丁缺字幸不補亥豕金石

文字記頗摘字畫之謬不知其爲月令點竄非典刑岱山鄒

補字非原本也吾友沈納佩云

嶧競寶貴石鼓徙置太學庭煌煌經學更鄭重懸鐘東序撞

在筵蕭齋佳客聚傳示摩挲開卷浮古馨細看瘦硬破俗體

旋取字樣資考訂況復明劃出舊楊蟬翼薄紙愁風冷惜無

良匠急裝潢明珠一一穿瓏璪州次肇開十有二十三經中

惟無孟子

唐人并三禮爲百城視此成伶仃石林賢裔有同好購如圭
一故又曰九經壁深繚局插架縹緗此爲冠緯雖有史經以經出遊慎勿輕
捆載白虹貫月驚書舲

朱

楓字近漪一字排山錢塘人著排山小集

汪嘉穀曰排山詩多紀游之作有秦川東歸湖城汴州
洛州嵩山等集凡八卷嘗刊秦漢瓦當圖記其自序曰
往在咸寧與秦之阿房漢之未央諸宮不數十里
詠茅披礫間有所得不勝狂喜其雅尚又如此

游終南山

山深人跡稀披榛路乃得逶迤苦竹叢沿緣絕岸側却顧青
濛濛城郭杳莫識綠蘿蔽紅蕤岩谷皆春色日暖鳥嚶嚶雨
過泉湜湜悠然清聽滿等瑟非所惑坐久澹忘歸輕衫暮寒
逼

西溪夜歸

探幽不覺晚山月吐昏黃一徑踏花影三更歸草堂到門衣
滴露入室酒吹香料得今宵夢吟魂繞竹房

山陽縣

放酒山陽縣初程一惘然扁舟歸白髮孤枕夢青氈亂竹搖
危磴寒猿嘯暮烟不堪今夜月故故向人圓

張元龍

字魯良一字曉堂海鹽拔貢生
官昌化教諭著松筠齋詩稿

趙北口

畫樓連接水拖藍烟柳絲絲送客驂若使軟紅清十丈風光

未肯讓江南

滑

彬

字又彬號魯齋仁和
拔貢生官溫縣知縣

華日南曰魯齋宰輝溫二邑年歲
傾產代民輸糧載邑志春秋致祭

九日

策杖獨登臺飄零濁酒杯花黃迎序發雁白背風來北嶺孤
烟直東湖曙色開離憂已無際落木不須催

查

基

字樞齋海寧人著叩彈雜誌韻府
珠船句陳錄及樞齋詩詞各鈔

嘉善縣志查基侍講嗣稟長子幼穎異博覽羣籍十三
遊庠以門房累隨父謫藍田蒙 赦歸走京洛遊遼左
性豪邁為詩文綴筆千言或丐其筆墨以輕裘報時方
嚴冬擁蓑夜坐有友以子死無殮告脫裘界之所著詩

詞皆沈文
慈手定

陳傳經曰少時聞父老言樞齋先生年八九歲已能遍
讀史漢騷選目十行下過輒不忘迨自謫籍歸鄂西林
相公重其名厚幣致之東閣中乾隆丙辰舉應
鴻詞科會中酒失期而罷著述甚富惜未盡觀

覺生寺大鍾歌

吾聞伶倫所著一十有二鐘聲諧律呂考擊開羣蒙大者為
鑄小劇銑用置明堂清廟與辟雍迄乎佛教入中土梵宮禪
室處處吟銅龍爰數有明紀永樂漢經有厥摩蒼穹鑄鐘不

知幾萬石範鎔擬罄南山銅道衍監造沈大筆上有千卷貝
葉稀微蹤鐘成架以凌霄捧日之傑閣道人欲打手脚嗟疲
慵遂令六僧同撞像六甲聲迴九地響徹蓬萊宮後因震動
鄰禁近勅教勿鼓勿考畱塵封下逮仁宗到天啟臺摧閣圯
餘額墉蒲牢蝕土經委地斜陽歆臥埋蒿蓬秋風淒淒霜露
白春雨點點莓苔紅運隆興朝盛功德城西覺生重建高龍
嵒萬牛推挽不可動鞭雷驅電母乃資神工鐘兮鐘兮幾衰
盛我于此際心忡忡憶從燕師特起號靖難推刃骨肉恣燔
烽其間帷幄者誰子披緇搗虐真梟雄忠良殘剝等犬豕猶
以佐命誇元功豈亦自知流惡磨不盡欲於鐘也懺悔諸天
中我欲碎之付爐鞴不使大地穢跡畱春容化爲黃蛇千億
萬良工匠石加磨礱傳畱萬古作神器掃除凶焰一一光吐

蓮花峯

山海關

月落巖關起暮笳行人回首望京華
黃榆日淡邊牆紫白艸風高塞雁斜
海濤東南浮蜃宅山遮西北湧蓮花
時平不必誇奇險六合如今只一家

鄒泰和學士邀集沈歸愚袁簡齋沈椒園遊黑龍潭分韻

城南風日朗靈穴共招遊萬港蘆花白一潭明鏡秋獨鈴清語塔斷岸暢浮鷗
那得乘雷電寒寒遍九州

俞

珮字季璵號潛齋錢塘人官崇仁縣丞有潛莊詩鈔

桐江漁人歌

漁人來往桐江口雙足弄槳捷如手日暮纜舟釣臺下持魚

上岸去沽酒小兒拈鍼挑青螺大兒提刀截黃韭老翁老嫗
已忘機阿婦蓬頭不嫌醜酒來相對傳青瓢笑聲啞啞出篷
牖醉眼不見山月高醉耳不聞江聲走但知山樹年年青不
信風波日日有我來浪遊過桐江覩此不覺心自咎嗚呼富
貴亦何爲愁殺妻兒與父母

棲水晚泊

秋郊堪寓目晚泊試推篷木葉千林雨蘆花兩岸風地連湖
墅北帆指石門東此處幽棲者漁磯一釣翁

楊

知字誨仲錢塘人諸
生著審是齋詩鈔

余習曰誨仲少從何義門方朴山游得所指授
鄭幾尺先生稱其詩清和醇雅深得唐人祕鑰

別家

門外雨如絲征人此別離病妻憂遠道稚子問歸期山放寒

梅後江生春水時登舟重回首心事少人知

郭廣琛

字振安號柳江海寧人有柳江詩稿

新柳

紅粉牆邊白板橋橋邊新柳已長條笑他纔得東風力便向人間作舞腰

秋夜病中作

秋氣正蕭然吾生亦可憐一宵長似歲好夢遠于天風緊鳴殘葉衾寒擁舊綿容華消瘦盡大半是今年

敗荷

曾見亭亭做綠盤西風何事苦摧殘獨憐細雨黃昏靜只蓋鴛鴦一半寒

沈

甲

字眷瑤仁和人貢生

俞省原祇文遊學桐里听夕相對作此示之

日日春陰作峭寒客懷聊共寄清歡誰言濱海非同井況復
論文得臭蘭楊柳條新東柵隱桃花漲近太湖寬明朝已是
清明節何處尋看雪一關

張宗松

字青在一字楚良又字螭廬海鹽人國
學生以子謬貴贈檢討著寒坪詩鈔

楊秉初曰贈君性耽吟詠與馬墨齋朱笠亭諸先生相
友善會記少時村居詩有隔水一牛橫笛去盤雲雙鶴
帶鈴歸之句先曾叔祖性夫給諫公一見賞之
妻以女家富藏書凡圖書彝鼎之屬鑒別最精

重陽過春林菴訪浮山上人

九日條已到東籬菊未斑因之攜蠟屐相約叩禪關楓葉飄
紅影蘆花占碧灣山僧如有待客至不空還

舍厂弟畱禾中未歸詩以訊之

阿連才調自翩翩況復秋涇地主賢對客屢傾缸面酒看花

不費杖頭錢月波樓上橫吹笛放鶴洲前索釣船知爾追陪
多樂事相羊未肯遽言旋

汪上堦

字綺巖一字謝谷給諫繼燦

汪氏世譜傳畧上堦抵大理治見民舍有白毫光一縷
默祝果有寃當見于夢是夜恍惚有人自稱王理家傭
問其居址指地下遺二李焉詰朝至其地問有李二者
乎發之果得屍蓋爲理所毆埋以滅其跡者遂伏法一
郡驚爲神明

汪嘉穀曰先曾叔祖以道學名儒出守大理其治行已
著家傳詩不多見子孟銷仲鈐兩叔祖並以詩文名傾
海內

除夕

笳鼓喧殘臘椒盤佐豆籩老妻嫺禮數稚子解詩篇
平魯屢空回也賢韶光迅如駛檢點度新年

張

蘭

字秋谷海寧布衣有集

西湖寓齋雜興

婚嫁事粗畢，皤如髯已絲。
學仙曾受訣，羈羽少安枝。
江海孤篷夜，冰霜倦馬時。
驚危惟自惜，兒女可能知。

山齋雜興

研朱點罷床頭易，一洗昏眸聊散策。
落日斜懸寺角紅，寒雲橫東山腰白。

史

倫

字天敘，山陰人。諸生著軼髯詩稿。

商盤曰：髯翁少日與閩林補山兩太史齊名而升沈各判。羅江東終未脫白身，所畱止此，故亟登之。

洮河飲馬行

疊藏橋邊三尺雪，關河凍合行人絕。
番兒牽馬飲長河，齒嚙堅冰口流血。
槎枒瘦骨挺風稜，駿馬自與凡相別。
豈知中使愛癡肥，目爲下乘棄如遺。
易茶七篋尚不得，仰天獨向長風

嘶於今伯樂那可逢
搜求沙苑報羣空
分付康侯早蕃息
勿令洮河流水徒淙淙

瓊花島

最憶高層擬廣寒
獨凭銀漢豔波瀾
傷心不爲粧臺圯
尋跡誰知別殿殘
椒苑無華春寂寂
棠陰何樹夜漫漫
登臨莫便東回首
一片嵯峨詎忍看

南望蕉園事已非
翠芬清馥尚依稀
北平潛跡神魚化
西內清齋異鳥飛
重寶忽經貂帳火
小寒漫試兔山圍
上林隙地從人便
金馬銅駝何處歸

錢

匡

字劍威海寧布衣有竹齋遺草

夜宿石門道中

疎星殘月起徘徊
浪趁西風蕩纜開
點點秋螢明草際
聲聲

兩浙輜軒錄補遺

卷四

錢

匡

陳思涓

馮嗣京

夜柝轉城隈沿湖簾爲收蝦去近斷燈因捕蟹來我亦客中
難睡著放船不待曉鐘催

陳思湄

字巨源一字角邨諸暨人諸生著有角邨詩草

江樓晚眺

閒倚高樓聽笛聲亂山剛與夕陽平碧烟邨近聞人語紅葉
林空見客行兩岸鷗鳬浮渚遠一天星斗落江橫漁歌唱入
蘆花裏又泊孤舟載月明

馮嗣京

字留土桐鄉人官長興訓導著因樹屋詩稿

朱彝尊序畧曰馮君詩直抒己意不惑于流派之說問
所學曰吾學吾特言我性情焉爾噫君其可以言詩也已

俞寶華曰留土負詩名與竹垞初白諸名流倡和集中
上選入

欽定國朝別裁中

懷樹臣兄大梁

先後書驢券三年離國門孤貧同野哭羈旅獨中原明月開
油幕春風念瓦盆燭花低映處笑語正黃昏

客裏仍桑梓南州一榻分吟詩梁苑雪把酒吹臺雲歲序音
書斷新交涕泗紛

其章幼漁先後赴至

硯田存八口何日罷耕耘

筠州卽事

肩輿尋古道脫粟飯山家屋擬黃岡竹茶疑普洱茶白鵬明
遠渚烏鬼亂晴沙一事舒民力驚湍旋小車

黃昌瓚

字德器號瑟齋臨海人

華日南曰瑟齋晚年以教子爲事孫潤亭成進士有聲

草花

何許青青紫翠團王孫陌上問名難燒痕乍逐春風長花樣
還添社雨闌盤馬地宜黏錦障鬪雞場欲奪朱冠百芳踏遍

天涯遠不及幽芬楚畹蘭

盧壽朋

字息池仁和人存心從子

初秋同人集湖舫

鵬鷗任逍遙何用分人已興來招朋儕共泛城西水山光澹
長畱悠悠今昔視何妨避殘暑遠向清冷溪蟬聲咽咽鳴不
厭聒人耳秋意靜涵波平鋪一端綺移時轉沙汀雲鷺翻波
起爾我宵忘機俱落空明裏飄搖一葉舟送以清風駛沿緣
五柳居其食鮮魚美

明湖深漾演龜魚之所家秋風一以吹淥水凋朱華輕橈沂
回溪蒲稗相交加看叉尺鯉雙漁艇共叫譁湖南淨渺瀰極
望惟烟沙翠屏未搖落碧樹環周遮顏陽動渚面千紋浮水
花鬚鬢雪相似素影垂髭髭悲思海門逝

謂亡友李海門欲從窮無

涯松林人不起肯惜濁酒賒

潘作梅

字戒平歸安人歲貢生官海寧訓導

海寧志名宦傳云作梅官司訓二十餘年善書工詩多所造就識鍾閣學蘭枝于童子時以女孫妻之沒後邑士思之立碑學宮

史正義云先生子輝癸酉拔貢樂清訓導孫琛丁酉拔貢景山教習曾孫銘王子舉人現官江南知縣科名累世人以爲先生成就人才之報云

題許繩武雪莊漁唱

多少風流盡入詩白蘇佳句獨矜奇鏡中濃淡稱西子堤畔勾畱記竹枝半嶺荒烟無客過兩峯劫火有誰知搜羅二一成漁唱應買扁舟作釣師

戴

滋

字元徵一字益巖歸安人諸生有蕉窗詩草

遊避村龍潛寺同四兄滄若

兩浙輟軒錄補遺

卷四

潘作梅

戴

滋

胡

泰

書

書

近看山勢更崢嶸佛座琉璃晝夜明黃葉亂隨人面落白雲
蒸向馬蹄生既能避世誰真幻豈不懷歸我弟兄好待春晴
花柳放再來空谷聽鶯聲

自歎

休將壯志對人誇自笑年來鬢已華蠹飽空餘書萬卷狐疑
莫辨路三義惟思向婦謀新釀不忍呼童掃落花四十無聞
何足畏偶窺青鏡一咨嗟

胡

泰

字蓮峯秀水人貢生官
彰德知府有梧園詩鈔

魯曰理墓志畧泰任景州十三載兼攝吳橋獻縣深州
事勘災監賑全活萬人獻獄多所平反雍正初擢彰德
守罷歸貧不能自存與兄子樹
薇樹柑講學于鄉著有蓮峯集

欽器圖

法器摩挲久名圖藻繪餘戒深持滿處意在執中初試想懸

繩正還疑注水徐來觀聞古聖警惕意何如

鷹窠頂望日出歌

義和作馭六螭騁金烏騰空色罔罔翔陽逸駭搏桑津迴光
直射鷹窠頂乍離海嶠如車輪滄滄涼涼氣未溫天風吹我
上雲岫朝霞曉霧相吞吐憶昔秦皇駐山末跨海爲橋觀日
出神人鞭石石去遲至今石赤如流血織女北嚮七星中雙
丸會此析木宮重光重輪方散彩烏兔相逐何匆匆

董兆元

字蕊采一字江峯鳥
程諸生著江峯詩

雙溪道中治舟

野塘春暖長蒲芽偶遡荒村繫小艇漁笛聲來溪幾曲酒旗
影颺路三叉柳綿作意都辭樹花鴨聞呼各認家日暮征帆
問前路迢迢回首斷雲遮

晚渡太湖

浪擁斜陽去冥冥萬頃烟橫空孤鶻健破暗一星懸辨樹纔分港聞歌覺有船倚門方計日白髮話燈前

閔振武

字商巖一字龍川歸安人諸生著有龍川摘稿

陳以剛序曰龍川篤行君子也爲文一本至性長君崎嶇爲予分校浙試所得士出偶存集讀之溫良淳朴之味如見其人

梅花

凌寒敢惜凍皴肌入夜芳心忍自持
堊寺鐘成門半掩孤城角斷雪初垂
夢隨月落千年恨魂繞遙山萬里思
幾許春愁長掩冉不勝清瘦倩誰醫

楊汝霖

字瑞文一字奕堂嘉興人官臨海訓導著有靈江詩鈔

楊蟠曰曾大父少有神童之目年十三補博士弟子員後官臨海一以安定經義治事爲法

甌江

路出枏溪望永寧青山長護謝公亭我來無限蒼涼意秋雨孤篷弔四靈

題曹娥廟

廟口殘碑六尺強頻年行客薦椒漿暮門寂寞生春草宰木蒼涼帶夕陽當日捐軀哀少女異時題背頌中郎我來憑弔情何限遺響猶傳河女章

張

逸

字泰菴一字日休又字溪叟嘉善人

俞寶華曰泰菴精岐黃術善琴工詩畫有日休堂詩張瓜田九友傳稱其家閒溪康熙甲午與人贖金買舟會其地訂交蓋玉山草堂流也

五日

亭午輕陰合江樞照眼鮮臨風單恰薄微雨一觴傳舊俗存

懸艾新聲斷采蓮醉看長命縷拭淚綺堂前

董

斌

字天聞一字二允龍游諸生

春日遊雞鳴巖步張道平韻

招提春半百花明翠溼巖泉古樹平此日祇聆黃鳥哢誰人
曾聽碧雞鳴溪光綠染烟霞色山氣幽宜鹿豕情回首龍邱
嘉道處悠悠一片白雲橫

壽

鼎

字長新一字鵬里諸暨諸生著有聽雪樓詩稿

史夢蛟曰鵬里先生聰穎絕世品學兼優年未弱冠卽名噪黨庠屢困棘闈退而講學遊其門者輒擢巍科而去其詩文遺稿士林至今奉爲圭臬云

登白湖嶺

百折羊腸道紆徐嶺路遙山高雲接面逕窄草齊腰野竹藏
荒廟溪沙護石橋行來無伴侶孤客倍蕭條

春日遊關山塢碧霞庵

迢遙空谷住僧家石路崎嶇雲暗遮幾夜春風開柳葉半天
甜雨養桃花寺當山腹千層碧水落溪心一道斜歸去聲聲
留語別重邀明日蹋晴沙

應

煒

字霞城一字省齋永康人雍正庚戌進士歷官廣西懷集知縣

陳傳經曰省齋先生初官閩之上杭將樂再任粵西所至皆著循績詩亦淵雅

探梅

不是山隈定水隈知從何處覓春回一枝折得花如雪消受
寒香漠漠來

料峭東風蘊笠斜衝寒十里爲梅花無端引我清閒興夢入
孤山處士家